

說部叢書

第二十四集
第四編

言情小說

西奴林娜小傳

上海商務印書館發行

西奴林娜小傳

英國安東尼賀迫著

閩縣林 紆
仁 和 魏 易 同譯

第一章

馬丁曰。一千八百八十四年。南美洲奧里塔蘭民主國。尙未臻於隆盛。雖據形勝之區。立國地亦廣斥。如英國之堯克歇埃。是時人言土地固廣。而國人屬望之心。初未甚慰。此國固由大國分支。國基未固。事事仍草創。未抵於完善。其所以立國之故。亦同美國之幸脫於英國之樊網。經無數兵爭。始克自立。國之立。卽立於一千八百七十一年。國中成立之顛末。有奧里塔蘭立國記。讀者可檢而核之。著此記者。爲美國大學之教授。曰雅里米。記中敘立國功勳。悉歸之第一總統馬格司灰丁罕。余固與此總統曾相過從。爲歡亦深。審其幹略。匪特國度爲此君所締造。卽憲法亦其手定。國旣新立。立祛舊時之弊。蕩滌無復餘。且使國民知墜地時。

卽有自由之權力。惟總統立法甚良。而見諸實行良寡。以天分高。學力渺也。平日自知其短。恆言曰。余之不學。以生長時。南北美方兵爭。遂輟業不能竟學。以史書核之。在一千八百八十年。總統已五十歲矣。以時考之。南北爭鋒時。總統亦三十五歲。詎以三十五之年。尙在學堂肄業。耶。然中年嚮學。或亦有之。無復深怪。時世界。中議論。咸謂此國新立。百度維新。爭拭目而望。維似日輪甫上。奇光射眼。然至日中時。又黯黯如秋日。無復鮮麗之氣。國中土地腴沃。本宜於耕牧二事。而民種至雜。性多惰窳。喜佳節。言歡。不耐力作。而又蠢蠢無靈敏性。間有秀黠之士。又往往魚肉其鄉里。以故國中財力。無復增長。咸飽之莠民之私憂。國中多得錢者。僅有兩種人。一則爲官。一酤酒耳。顧此兩種人之生財。自英美人眼中觀之。尙不目爲多。出產既微。工藝復鈍。而賦稅又日增。以余思之。此總統以戰績名。庶政似非所習。總統之下。尙有樞密大臣三員。尤有國會之會員二十五人。助總統行政。而大權仍屬之總統。大權既屬。則責備者不能不屬之總統之身。惟總統肩此大權。

初不覺重。但徜徉如無事人。余於一千八百八十年三月第一次踐奧里塔蘭國土。都曰灰丁罕。都固瀕海。吾一登岸。卽履國門。則年方二十六歲。盛氣勃勃。自謂如是少年。而銀行主者乃命余爲分行總理。眞異數也。吾主者摭略迥異常人。恆冒險而求倖。此遭爲總統屢以書邀主者設分行於此。主者遂以余來。余初不習是業。以與主者交厚。且負余父之責。爲數未多。乃久久未還。以此之故。余聞有灰丁罕之局。遂往造之。主者果以命余。月受俸一百員。美金也。余以少年盛氣。誤爲一事。聲名遂敗。然余甫至時。而此支行已設六閱月矣。此六閱月中。承乏者爲湯麥司穹司。此人爲老練之書記。自余受事。湯麥司則退司會計。爲余所屬。灰丁罕城頗團結而精雅。居民可五萬。地復瀕海。風物良佳。城中多衙署。及逆旅。有塵肆一條。商賈所聚。稱曰一千八百七十一年街。志立國之始也。街中空曠處。卽爲總統立馬之銅象。象之四週。均列鐵榻。便遊人憩息。左近有咖啡肆。及奏樂之場。交下午時。商民咸戾。夾道皆樹。樹陰綠縹。足翳行人。去此半英里。卽爲金宮。總統治

事宮也。以白石爲墉。外狀宏麗。宮門之上。有金塗奧里塔蘭女神之象。右手執劍。足下立一巨彈。然非彈也。後余辨之。乃爲金塊。金宮之名。卽肇於此。總統意後。此必有金礦發於國中。特立此爲兆。實則久無其事矣。余生平不喜逆旅。一至卽賃寓於人家。適有天幸。得一羅馬教士約克司所居屋。教士和平。足與處。議定膳宿之金。月五十員。以故余俸舍五十員外。尙餘其半。在灰丁罕。亦不謂非小封也。亦得稍稍與國中名士遊。卽金宮亦時時通謁。國中少女。又稍稍歡洽。余初至苦寂。今得膩友。爲狀良歡。至銀行中貿易。亦未充擴。幸能得資。有時爲人積欠。而大戶假金子。金良厚。以盈埒虛。於歲時報告帳籍。主者尙不加斥。國中亦頗有疾視之人。顧久久亦無侵擾事。其所謂疾視者。其畔實肇自國債。而吾事之大局。亦出諸國債之中。故余另列一章。中專敘國債。

第二章

當分行初設於灰丁罕時。奧里塔蘭政府。曾與余立約。言國中公款。悉吾行爲之

經理。大類彼都專設之國家銀行。權利既大。每假五十萬員。年計子金六分。用爲酬報。時總統前後欲共借一百萬元。爲船塢。以停商船。總統用意。本以適民生。大利便交通。顧此借款。余特爲之傳言。假五十萬元。及約立質定。卽於六月中。余費五十萬元。上總統。總統曰。此五十萬元。假諸貴國。餘五十萬。吾亦別有所假矣。工且立興。更兩年者。則吾國船塢成。萬商輻輳於此。君家亦可放懷於此款。須知此遭事。貴國乃大有見。余亦謝總統褒嘉。總統賜雪茄。余亦受其一。出自宮中。此心廓然。蓋此事。非余發謀。至此五十萬員之能歸與否。均非吾責。然心中亦思此五十萬員之巨金。孰允之者。偵詢乃不得其主謀之人。及工程既肇。第一期子金如約而歸。惟圖工甚緩。以余策之。工中所費。僅及十萬員。而總統家却開一地。窖且廣。築垣墉數處。二年中治塢者。尙有數工。此二年後。乃並此數人之影。亦藐不見。正於此時。總統忽置酒延余。時爲一千八百八十二年七月。余既赴宴。治饌良佳。宮中之客。但余一人。余心自念。總統置酒。乃專爲余。其見重至矣。旣而又思特

宴余身。或貿易事。於是二人對觴於殿廊之上。酒餚皆精。總統爲禮至恭。雖無學堂中之學問。而竟有世界中之應酬。對客談吐。厥狀甚習。時稱余爲少年有才。則尤深中余懷。又歷歷述其生平之戰績。自謂非敢超越人上。惟於國家却有微長。縱有私憾。或可以功掩罪。余亦報總統曰。上公勳績。直可追蹤凱徹。及亨利第四。總統曰。然惟余。尙余思此二人。總統或未之識。願無敢詰問。亦漫應之。飯罷。總統仍無重要之言。但命取雪茄授余。並飲余以酒。曰。人言煙酒不並用。酒多則茄淡茄濃。則酒薄。吾則不然。並用之。乃見兩物之俱盡所長。余如總統言。且吸且飲。主客均無言。總統忽曰。密司忒馬丁。吾國至可危。前數日。適有地震。余曰。上公得毋言地震耶。曰。否。屬財政耳。船塢之工。繁費乃爲吾所不料。工程師以簿至。言費至九千萬零三千員。而工程之竣。期乃逾遠。余心自念。此工方經始。胡能耗此巨金。卽啟曰。以理論之。工力毋乃過昂。總統曰。此有工程師簿記在。非妄言也。余思此簿必僞。因復啟曰。既有簿記。焉能生疑。總統曰。然錢旣無多。萬不能迫民枵腹。

以從事以理言之。王不宜停。顧無資。又焉能善。其後工程不成。吾之清望立墜。而反對黨以某大佐爲魁。甯不授之以絕巨之口實。余曰。此大佐乃大梟。訐總統微。晒曰。大佐亦非精誠愛國之人。然多資而有力。國中陸兵舍我外。卽彼足以調遣。吾尤知彼與西奴林娜爲死黨。故吾之國家殊岌岌。非財莫可。密司忒馬丁能更假我以資乎。余思此請貸乃大難。倫敦中主者已深悔假資之失計。而買債票者亦嘖有煩言。今日特自相爲慰。隱冀其勿敗。且半月以前。奧里塔蘭度支大臣安東尼倭已至而籌議。將更假資。余以電請示於主者。立得報言。力止勿貸。余遂以回電示度支大臣。度已復之。總統今總統復言。余遂舉前電之言以報。陳謝無力。總統微喟曰。尊行主者似無燭理之明。今先請君覆此。餘杯。余曰。某亦宜調酒。壽總統。總統無言。待余歸座。始言曰。密司忒馬丁君年雖少。爲任非小。然以幹才言之。足稱能手。余遂鞠躬謝總統。總統曰。君在此。彼總行中宜授君以特權。余曰。纖小之事。吾尙能爲。總統曰。纖小之事亦包絡假資與人者耶。余曰。凡兌質之事均

某主之行後以冊籍歸告主者。總統曰：如此授權，主者亦尚有見貿易之場，固當有便宜之權。若事事遙制，何能臻於美善？余曰：蒙主者見寵，尙無敗勦之時。總統曰：行中儲財多，亦有時出貸取子金，且由織而至巨乎？余聞總統言，似值取余，卽謝曰：卽有出貸爲數亦微。總統曰：吾近聞尊行似積一巨款，將旦夕貸之於人。余此時幾忘總統之貴，卽躍然起曰：君乃有巫術，何由值得吾陰事？總統曰：密司忒馬丁吾度君陰事固謬，然客亦太縱恣，無禮。余亦覺其妄，雖知總統之非人，然義宜媿謝。卽曰：死罪死罪，惟敝行有積貯。總統何由知之？總統曰：穹司見告，余不卽答。總統曰：吾近知尊行推質而取金，似知敝邑不善，故收貯而去，以數計之，尊行似有三十萬元之多，惟吾亦老於事者，知天下貿易之局，不必就安常處順中覓之。惟眼光遠，心計長，遇險熾亦足得利。尊行主者似薄，吾所爲故以收斂爲良法。君身處人下，不能不遵率號令而行，然而吾勸足下出其獨斷，且勿遽告主者。待得利後，歸述其功，主者方禮君之不暇，而何暇責也？余爲總統所動，頗用躊躇。

卽曰。吾既以金假之總統。其將何詞對吾主者。總統曰。爾行中無丁甯。禁爾借資之理。爾但告之主者。言此金已假之。妄人無憂也。余曰。然則總統令我作僞冊籍矣。總統曰。冊籍固僞。而情事則確。汝復何憂。余曰。身既在此。卽爲轄下之民。果能以資助興國家。亦屬吾願。惟有二事。尙須籌度。第一節度支奇絀。吾子金於何取償。總統曰。汝言良然。至第二節。雖不言吾亦知之。得毋謂君任此重責。苟無少酬。亦不足慰君之意。余曰。總統可云善於體察物情。總統曰。君言二節均在情理之中。且聽吾言。足令君自慰。果使假我三十萬元。我必以政府之債票爲質。月子金六釐也。且就三十萬中。提六萬五千元付之。足下暫存四萬五千元於君。許果子金。莫應者。卽於是中取給。此足應二年餘也。惟子金。吾仍按年而予。此特先事預儲而已。果吾子金不短者。則此四萬五千元之子金。卽可歸爾。餘二萬元者。則爲爾酬勞之資。密司忒馬丁聽之。君得二萬元。又得四萬五千元之滋息。尊行中所期者。但注子金。而吾國得金。又足資治甯。非三善俱備耶。余聞之大悅。似總統之

言一無弊病。爲我私計。及爲主計。靡不善。蓋二年之子金。已握吾手。惟爲勢亦險。果主者立索吾母金者。吾將如何。旣而又思。決無其事。矧吾私囊已積二萬元。卽使見逐。亦稱小封。此何礙也。總統見余無言。卽曰。密司忒馬丁。計決乎。余尙躊躇未之答。總統立起。以手拊余背曰。汝許之矣。我本不欲導君以闇昧事。惟敝邑無此金。亦不能安於其位。余飲酒言曰。總統之命。吾焉敢違。總統曰。然則汝允矣。且執冠與吾同行。余曰。總統卽於今夕索金耶。總統曰。貿易旣成。以速爲佳。余曰。總統債票安在。吾得債票。方能授金。總統卽取巨囊。言曰。吾已前備。卽發囊示債票。曰。三十萬元。按年六分行息。余及度支大臣。咸簽名。今其以冠行乎。余如言。隨總統出。

第三章

是夕月明甚佳。此一千八百七十一年街。通明如琉璃。世界總統疾行。余尾其後。余旣懷疑。狀類逃。答之。狗總統曰。馬丁。汝爲是事。是踐名譽階梯之第一步。願余

心。此。時。又。似。踐。殺。人。臺。之。第。一。步。矣。願。左。足。已。窺。則。禍。福。咸。非。已。所。定。於。是。不。復。更。思。及。至。總。統。銅。像。之。下。余。卽。指。像。言。曰。總。統。爲。人。仰。賴。至。此。誠。人。間。之。偉。人。吾。區。區。之。金。實。託。旃。幪。之。下。總。統。曰。吾。惟。審。機。行。智。故。臻。此。極。地。余。知。總。統。殆。卽。行。智。於。我。躬。願。亦。不。念。卽。亂。以。他。語。曰。吾。能。否。往。面。度。支。部。大。臣。總。統。曰。何。爲。面。彼。余。曰。國。債。之。事。必。得。大。臣。一。諾。於。義。法。始。合。總。統。曰。吾。爲。一。國。之。主。主。乃。不。能。專。決。而。必。待。度。支。一。言。始。定。耶。況。有。彼。簽。名。在。是。何。須。往。擾。其。睡。余。曰。果。面。穹。司。者。將。何。言。以。對。總。統。曰。汝。爲。彼。主。詎。亦。不。能。專。決。余。銀。行。本。在。自。由。街。距。來。路。至。邇。已。而。至。門。余。以。匙。啟。關。入。至。於。室。中。卽。鐵。櫃。所。在。總。統。見。鐵。櫃。卽。曰。彼。中。何。物。余。曰。美。國。債。票。及。倫。敦。紐。約。期。票。總。統。曰。聽。余。觀。之。余。啟。櫃。出。票。總。統。逐。一。而。觀。余。以。燈。照。之。正。於。此。時。忽。聞。門。外。有。人。呼。曰。汝。敢。少。動。者。吾。卽。放。槍。余。大。驚。而。總。統。亦。向。外。而。視。則。穹。司。也。彼。夫。妻。方。同。居。於。此。聞。聲。而。下。衣。寢。衣。執。槍。對。總。統。頭。顱。忽。曰。總。統。耶。馬。丁。耶。吾。乃。不。期。其。至。此。言。下。大。異。總。統。曰。密。司。忒。馬。丁。必。能。告。爾。

以故。余在匆匆中。卽謬言曰。適得歐洲急電。言以金假總統。正於此時。付金於總統。穹司曰。今日電至耶。吾奚不知。余納手衣囊中。索之不獲。僞曰。胡以不見。卽曰。總統。吾殆遺落於府中。總統曰。然。吾臨行。尙見案上一紙。橫陳。也是必電報。詎穹司有權。可觀電報耶。余曰。否。總統曰。卽使欲觀。明日可以寄示。余面穹司曰。密司忒。穹司爾。爾莽至。是令人生訝。且以寢衣見客。此何禮耶。穹司聞言。趣謝過。引屏言曰。君能否聽我助君料量。余曰。行也。穹司旣去。總統無言。余思妄言電報之事。頗用爲難。總統似知。卽曰。君早夙具一電報爲佳。余曰。然。非是。不足以示信。僞電。吾焉能爲。總統不言。卽取小紙作數字。付余曰。汝但以此紙付電局。彼卽以局中格紙授君。君謄之可也。天下謀事與國主謀之。其獲良易。今爲時已晚。期票債票已盡。爲吾得而吾之債票亦付爾。茲事已了。而吾國之困。因是而蘇。汝亦得寶可云。數美並集。而我尤極感。爾歸途無勞。遠送卽此訊。爾晚安。總統旣行。余獨坐觀此所留之債票。心中陡覺爲彼所愚。且吾一生聲名。果不幸者。卽立壞於是。旣

而復觀私得之六萬五千元則又色然而喜遂亦不問悉納之鐵櫃之中自歸己寓歸時天已遲明近五句鐘矣入門時神甫已晨餐將出門撫慰病人既見余歸乃大訝余見神甫有見疑之意即曰適歸自銀行中也昨夕爲總統留而夜話又至銀行治事不期至於遲明神甫釋然與余爲禮而去以上爲余以資假總統之始末及余身入轡轡中之情形也

第四章

余與總統私授巨款後數月以來帖然無復變故惟余於明日責備穹司之無禮且以僞電示穹司穹司亦不吾疑且以書至總行亟稱穹司美爲之增俸冀以此要結之顧大局雖甯謐而余心終戚戚負咎時總統假資後於國中一無所爲而海塘之工仍罷不舉官俸士祿久積不予余心愈疑知總統已淪此巨金於無何有之鄉且視余漸落落余尤深駭其負恩及半年以後向之索第二次子金乃抗不吾授余但能取之四萬五千元之中矣總統之對余則言船塢未成無生利之

方塢成必不負諾。余知總統之言。特出粉飾。後來之局。將不可問。余之與總統積。忤。其端卽肇於此。願以私交論。其人亦良有趣。若以貿易中信義言之。及任國之。重。則是人乃輕狡無倫。其中尙有故。亦吾敢忤之端。蓋余在灰丁罕中。本心醉風。月之場。婦人之契。予亦衆。今既得二萬元之腰橐。則膽力逾巨。以豪賭之。故遂與。西。奴。林。娜。相。稔。此。人。卽。總。統。與。余。相。見。時。所。稱。述。者。自。一。識。是。人。而。後。此。之。事。局。巨。矣。此。女。爲。舉。國。所。習。知。而。來。歷。亦。無。人。能。辨。之。者。方。余。至。此。時。女。在。國。中。已。近。一。年。其。來。也。與。美。洲。俳。優。同。來。俳。優。既。行。女。遂。獨。留。於。此。人。言。此。女。非。依。人。爲。生。以。樂。灰。丁。罕。風。物。不。期。遷。延。未。去。實。則。此。女。愛。灰。丁。罕。耶。或。灰。丁。罕。中。有。人。愛。彼。也。女。本。與。總。統。金。宮。望。衡。而。居。一。上。高。樓。已。洞。見。宮。中。亭。臺。花。木。同。居。有。一。老。婦。人。女。則。稱。之。曰。舅。母。衆。則。稱。此。老。婦。曰。密。昔。司。加。林。登。其。稱。女。曰。西。奴。林。娜。者。猶。人。之。稱。閨。秀。爲。姑。娘。從。西。班。牙。稱。以。女。在。劇。場。中。已。有。此。稱。實。則。女。非。西。人。蓋。英。人。也。女。亦。自。言。西。奴。林。娜。較。之。密。斯。爲。韻。故。從。是。稱。老。少。二。人。同。處。初。無。間。言。而。

服飾起居頗近華侈。至金之所自來。衆皆莫得其故。但女年方二十三。而顏色復佳。衆遂疑女之金實從此得。時女家恆宴客。總統復過從無間。衆憚尊貴。遂無復加以流言。女匪特與總統往來。亦與反對黨喬治大佐莫逆。大佐產自蘇格蘭。遂入是間軍籍。卽統其兵權。位特次於總統一等。當大佐進身。本總統卵翼以成。至是遂力與總統反抗。總統之不悅是人。余心亦頗謂然。顧總統雖不之愛。乃不能禁西奴林娜之不愛大佐。西奴林娜之名。本余所夙聞。及與往來。則尤欲探其蹤跡。余旣年少。彼復美麗。慾念在所不免。今亦不能形容其美。以筆墨所能。實不足以狀美人。但聞人言曰。凡國中妬女之人。咸未嘗聞有議其醜者。國中無論貧富老少。但西奴林娜令入長跪於膝前。亦無一人不甘心俯伏者。余旣擁二萬之金。遂亦夤緣得面此女。卽使浪擲在我。亦云享此豔福矣。女家常有蒲博之人。余卽進身以博。女初不博。但好旁觀。有時亦附資於人。其酬應之良。直一時無出其右。與人親而弗狎。遠而非忽。或合資於人而勝負亦不形其喜愠。余時往女家。靜察

主人之心。似不以余爲厭物。密昔司加林登者。老而悖戾。往往忤客。獨加禮於余。女每於禮拜三。輒燕客。匪人不赴。而爲女所屬意之數人。恆於禮拜三前。作小會。余乃倖附其列。而大佐亦恆至。左右梗我。此足憾也。總統或有時而來。其親乃不。如大佐。總統有佳運。每博必大勝。出人意表。余恆負喪其資。總統自言佳運之事。我至忠無二。西奴林娜聞言。卽以目視之。曰。總統果能垂青其人。人又安敢二者。大佐聞言。怫然大佐者。鹵莽無倫。謂西奴林娜宜禮我。卽總統亦當避我。有時至。直面總統言之。總統夷然不之忤。然窺女之意。又似右總統。而左大佐。於是此二人。咸在余媚嫉之中。顧自知非分。胡敢與。是二人角也。惟頗令人怏怏者。每賭必負。二萬元中。破耗絕速。誠告讀吾書者。自余入此。是非之門。可六閱月。二萬金罄矣。今但能移用此四萬五千存儲之款。迨第二期至。總統尙予子金。予乃自思。子金既付。則此四萬五千元。尙可假以縱博。博勝則二萬之金。仍屬我也。於是匆匆至於一千八百八十四年春矣。自外象觀之。吾身似至悅豫。而輿論已譁然不以。

爲可。國民以窮約之故。謂總統者假國債特用爲還息之用。士祿兵糧。一一積不
之。予。而報館亦逐日發論。一日爲三月某日之下午。余至西奴娜林家。此時適爲
外議騰沸之日。余本早赴其家。以行中事集。至乃稍緩。一入門。博徒已盈局。衆聲
譁譁。主人初不入局。移榻近窗下而坐。余進與鞠躬。女曰。密司忒馬丁。乃大忙無
暇。眷我。余曰。外身弗至。而內心常依左右。女曰。徒思何益。少頃。又曰。是間太熱。可
同至花窖之中。觀女意態似專意遲我。乃大悅。遂同至玻璃屋中。與賭局絕。邇玻
璃屋中有長條巨葉之植物。余二人藏諸綠陰之中。乃無人見。聞總統與大佐言
曰。爾內媚之工。較我爲良。女方采白薔薇於手。聞言流波盼余。而哂然。哂中帶肅。
似不屬意。於是言曰。此二人似非浹洽。余曰。以狀度之似也。女曰。二人之中。汝胡
擇。余曰。奧里塔蘭中。吾但愛一人。女以齒齧花似笑。似嗔。又似納予之言。因顧余
曰。此一人指我乎。詎灰丁罕。閨秀之中。至無一人稱君之意。余曰。世界中舍此一
人外。實無第二人稱意者。女曰。此意誠乎。或言甘而意左。吾苟以事奉屬。必未能

也。余曰：一聞命令如錫奇福，女不言，仍齎薔薇。余速之曰：請即發令，匪不敬謹。奉行女曰：然則諾我矣。余曰：有功之後，賞賚如何？女即更采薔薇贈余。余曰：以此酬君，余放膽曰：得花欲並得此贈花之人。女曰：花乃不遠勝贈花之人乎？平心而論，酬庸亦有先後。詎君以資予，臧獲一入門，即並付之耶？余聞言，乃不能駁詰。女此時伸其玉腕以花授我，余意至醜，則力把其花，親之力重而花幾碎。女大驚曰：果贈君以折花之人，其鹵莽或不如是。余曰：是安敢者？今當面試其事。女搖手曰：不可。忽又言曰：君憲政黨耶？自由黨耶？余曰：胡爲語及政治？女曰：他事久已厭聞，不妨聞此實相語。君究何黨？余曰：西奴林娜屬何黨？籍女思久曰：我尙爲總統之黨，人以待我，尙有恩。余微憎作聲，而女已聞，即曰：汝適何言？余曰：無之。但言總統不惡女，哂如不之聞，即曰：吾心固屬彼，惟彼之行事初無遠識。余點首曰：鄙見亦然。女曰：即大佐亦不謂然，但以國債言之，似與君良有係屬。余曰：然爲款乃非纖小。女又微語曰：於君何如？余曰：我非擁資之人，安有巨金假總統者？女曰：知之。吾所問

者。於國債中。汝曾擔其責任耶。余愕然。疑其已知。女此時行近余前。以手拊肩曰。馬丁。汝愛是人。復疑是人耶。余聞言。自思。女言固當。顧余良不能語之。以真情。但曰。倘此債有不能歸者。則吾代人行事。於責任中之聲名。滋有損也。其他則主者之事。亦無敢輕告所愛之人。女復微哂曰。然則爾心似不欲國家負債不還矣。余曰。然。但吾力所及。即欲求免此禍。女曰。汝苟知總統果不能償責。則我亦負累。汝心當尤弗適。余方欲以情愛之言。溫存此尤物。即聞總統發聲問主人所在。並言我欲行。當一謝主人。女即止。余曰。勿言。今當趣赴客堂。密司忒馬丁。我果有事奉屬者。或能爲我極力籌之。余曰。汝但呼我爲約翰。無復爲是尊稱。女欲笑。即力禁而言曰。約翰。汝當爲我肆力也。余曰。即索吾命。亦可何論。吾力。女聞言。即以手授余。余捧而親之。乃隨女至客堂之上。客已罷賭。分屯而立。專候總統與主人爲禮後。亦各爲禮而行。余竊窺總統與女敘別。作何密語。則欲偵而得之。顧度支大臣之女。忽進而與余語。女亦西班牙人。貌頗娟麗。特自少讀書於美國。行止均習美。

俗不類西產。其意似重我。見余與西奴林娜交情日密。似有妬容。卽曰。汝在花房。嘗春光至也。余曰。方聚談貿易事。西女曰。吾但聞爾作貿易語。吾父之赴郊。以。外風沙蒙面。亦正爲大貿易而行。余曰。尊父何圖之。巨西女曰。似涉國債。特令我勿言。余不願留此。卽草草與握別。將行。余方著外衣。大佐亦行。乃約余曰。與君同。出道中。作寒暄後。遂言曰。馬丁。吾及君所爲。分道而馳。但有一事。利害同之。余聞言。卽知涉及國債。遂默不之答。大佐果言曰。吾言卽國債事。似涉君。余曰。凡爲銀行中人。債務是其職業。大佐曰。然。將來將與君共事矣。乞君留意國債。行再相見。祝君晚安。余聞言。戚戚知其非祥。旣歸。則反覆不復成寐。後此更思西奴林娜亦我同病之人。此心一涉玉人。卽頽然安息矣。

第五章

爲時旣迅。而奧里塔蘭財政之奇絀。初無挽轉之機。人窮固可憐。而國窮尤爲可怖。奧里塔蘭者。今果成爲窮國矣。國中私家固有富者。而政府特貧。以政府之貧。

則凡爲政府所用之人亦赤貧如洗。銀行中固有微儲。顧乃非余所有。頗防金鈔外散。紛來取金。則不能不爲之備。因以電歸索見金。時奧里塔蘭政黨之齟齬亦臻於極地。一日爲五月下旬之午後。余至議院中坐聽。自樓上下矚。見大佐方痛斥政府治事之劣。責問度支大臣。以何時可得兵餉。度支大臣如受棒之狗。蝮伏無敢動。非總統在座者。大臣幾欲潛遁而去。已而度支大臣亦起對曰。我終當籌款以濟國屯。余不忍觀。卽出議院。至一友人之家。友爲女友。曰馬丁地瓦。其夫爲法人。自紐加里度尼亞至此。夫死而寡。據人言彼夫之至紐加里度利亞者。以與政府論議不合。故投荒至彼。此語似涉粉飾。又安知非流死者耶。馬丹恆對人言。深詆法王之無道。欲以少張其亡夫之譽望。然但以馬丹一身而論。亦精於涉世。而善酬應之人。余入時。馬丹方飲茗。有數人聚談。度支大臣女安東尼倭在焉。尤有一男子曰約尼喀爾。亦與席。其人英產。家亦富碩。第爲少子。不足承業。但攜數千鎊至新國度。冀自立其門戶。國度新立。購地極廉。故約尼喀爾廣購田畝。立家。

於此其人爲憲政黨。與總統善。總統有簡派議員之權力。故約尼喀爾亦與議員之選。然鈍根無復意識。但能佯歡僞笑。趁人行樂。余呼曰。約尼。汝胡不至議院。今日本可恣爾談鋒。力助政府。且汝去時。亦可提挈安東尼倭女公子同行。彼輩幾欲吞噉度支大臣也。約尼曰。確耶。吾更進一餅立行。且彼輩何事。恨大臣不已。余曰。陸軍中人索餉。大臣不可。因而爭論。約尼曰。非不可也。實則度支大臣實無一句甫語至此。安東尼倭女公子卽曰。馬丹請止二客。勿談國事。吾輩茗話至樂。甯不因此而敗吾興。余曰。何必主人。卽密司一言。卽可爲吾法律。然終須一問。約尼所謂度支大臣無一者。此一字的爲何物。女曰。勿言。吾父但有一女足矣。余曰。得賢女固高於萬金。而心中知女意不欲余窮詰約尼也。女卽又曰。密司忒喀爾幸勿嘵嘵。君於是中初不了了。喀爾者鈍根不能作他語。但曰。吾殊未知。此時主人爲余斟茗。微語曰。君果爲喀爾良友者。但祝其勿與知大事可也。余曰。我果在愛末。則甚欲聞其心腹之言。主人曰。大佐之意亦如君。吾尤聞西奴林娜亦欲就此。

君探取消息。余曰。卽探取消息。非復惡意。殆欲助之耳。馬丹曰。意之善否。君旣與交。當自明晰。我何知者。余曰。可止勿談。吾之來。意在避讎。馬丹曰。君來避讎。或日來。蒲博大負。怏怏如彼。度支大臣矣。余曰。度支大臣。又何爲者。馬丹曰。無之。惟我有國債票者。以速售爲得。余大悟。知喀爾所言。卽云。國空無帑。此債票不足恃也。此時度支大臣之女。已遙遙踞一座。似有煩懣之容。予卽就而語曰。我或開罪左右。乃屏居而懊懣。女仍懷妬曰。卽開罪鄙躬。亦何足言。吾較西奴林娜輕也。余曰。西奴林娜安足言。重置之足矣。女曰。汝果與西奴林娜交惡者。吾力尙足助爾。余曰。吾何事待助於人。女曰。吾尙未言。余曰。卽言何妨。吾或求助於君。女曰。密司忒馬丁。吾實爲爾友。極力思助。今茲之局。汝尙未悉乎。余曰。或以我無資乎。喪資尙可稱貸於人。女曰。汝惟外我。故漫應我。我尙何誠告之有。余思此女。詎有助我之方。願吾心誠屬西奴林娜。良不能用彼之身。而靳吾之愛。則天良滋不可問。卽曰。吾事滋重。卽欲見拯。恐亦莫及。女曰。汝言良然。惟後此沈溺將更深於此。余曰。謝。

君美意。後來終有懊悔之一日。女遂不答。余亦起別。約尼與余同行。道中言曰。時事非佳。以吾卜之。總統手造國度。縱有大佐等人。與之爲難。總統必有以善其後。余漫應之。迨既分手。余遂購得報紙。爲政府之機關報。上書。今日午後議員提議國債決議事。外人固無知者。然以大局言之。於時屯庶幾有補。前此國人稱總統爲救星。想不久此稱謂。行且復見。余思此時總統或歸自議院。且往面之。遂徑至總統金宮。閣者言總統在度支大臣家。余亦至安東尼倭家。以名刺投入。作數字。言將單面總統言事。侍者導余入。而總統及約尼咸在。既坐。總統曰。君欲面我。必爲國事。此二公亦政府中人。公事可公言之。約尼者尤爲吾之書記。君果有語。可以面談。余本圖獨面總統。而又不能屏此二客。卽鞠躬曰。適求面總統。以新得總行一書。聞貴國有不靖之耗。且言國債有不可深恃之勢。命吾求謁總統。言月盡後。卽爲付息之期。總統曾宿儲此款否。總統曰。此語應問度支大臣。不當問我。余曰。本總行之命如此。下走僅能遵率而行。總統曰。既云有書。能否見示。余曰。此書

甚祕。不敢奉呈。總統曰：以此之故，故欲獨面我躬，究之不讀是書，亦可。且來書電耶函耶，語時乾笑，似知余爲僞。余曰：實函非電。總統卽面度支大臣曰：吾事可以徑語馬丁，請彼告之。總行勿必介介。若患子金難應，必使國家擔任者，則不復成吾國體。余曰：能否以電覆敵國總行，言貴國必不貽誤。總統曰：斯言尙未悉耶。汝尙患其不得子金，乃令人駭聞。隱指存款語已。又面度支大臣曰：汝謂我言當乎。大臣點首。約尼喀爾，忠厚人也。知還金必無出，則瑟縮於坐。余固解總統之意，請余取子金於存款中也。顧所餘亦無幾。余亦將需此以清吾責。此次固可支拄，更下者罄矣。然總統已允能還，余亦無可駁詰。鞠躬自出。明日余至銀行，穹司方摒擋信札，識以號數。凡歐洲來書及電，少積必穹司爲理。清理後，必請余檢閱。故一一陳諸余前。余少翻之。均二年以前陳舊之書。余曰：胡乃久久弗理。穹司曰：前此必數月一理。惟先生蒞事後，未發此令。故今日吾自治之。余曰：此吾之疏忽。其中或未。有遺缺乎。穹司曰：他不之缺。惟第二次歐洲所發國債之電文，初未。在內。余曰：

然心中自念此電僞也。行將毀之。詎穹司豫爲吾毀。知吾詐乎。卽曰。汝以此電焉。置穹司曰。已爲總統取去。余大驚。穹司曰。吾乃未告先生耶。先生於是夕付國債。明日總統自來索去。電文言係先生索。取付之度支大臣。總統言觀後卽歸。先生詎今尙未歸乎。余怒極。顧不敢洩。卽曰。總統或忘之矣。事願莫須有。汝勿念也。穹司曰。然則吾退矣。吾妻尙待我同行。余心亦速其去。卽自思。總統老奸。乃執我僞電爲據。余初猶無懼。以此罪果發。二人同之。咎不專屬。今則總統可以告我爲賊。我轉無證。與之對簿。錢果吾用者。罪尙可任。乃彼多而吾寡。罪復在我。我何以堪。因憶二人在道時。此老奸言善用機會。固已有心陷我矣。

第六章

逾一禮拜。余乃大忙。凡可以括取備應。第二次子金者。匪不索之。且總統所授之金。余已費去二萬。而四萬五千中。所餘亦僅一萬而已。尙短五千。當以術濟之。余正在困難中。而噩耗復至。轉益余敗。家中書來。銀行主者本負吾父之責。乃不知

後此與主者作何貿易。至轉負主者之責。至二千鎊。主者索責急。至於反唇。並言果不還。將卽余名下取其勞薪。主者之無情。固至極地。而據理又甚正。吾父子但有入獄行乞。爲歸宿地矣。心緒旣騰沸。至於西奴林娜家。亦絕迹不更往。長日兀坐。視其行囊。不審何時負此。而遯。一日正在銀行。思得五千之款。忽聞門外有馬蹄聲。已而門開。穹司入言。大佐喬治至。余少與周旋。大佐竟入。脫其手套。歸座。余曰。大佐見枉。何以見教。大佐不答。直待門閣。穹司出。始面余曰。馬丁茲事。吾已澈底知之矣。余曰。何也。大佐曰。老賊蘊其奸心。以爲智足。以愚衆。願乃大誤。余曰。大佐胡不質言。大佐曰。汝亦知月杪出子金。總統乃不能應汝。汝知之乎。余曰。知之。大佐曰。汝尙未知此子金。永永不復出矣。余大驚曰。何由永不見付。大佐曰。總統於此三十一日。宣言於衆。不認有此國債。余暗然無言。但以背就榻。以目向大佐。大佐夷然以火然菸而吸。此時又聞車聲至門。有一清脆嬌柔之聲。爲余所習聞者。語穹司曰。吾匆匆中。將與密司忒馬丁言。不稽留也。幸爲通之。然不待其通。織

步已入見大佐在余室。卽曰：大佐曾以惡耗語馬丁乎？大佐曰：適已言之。余此時如亡魂亦不能起。與玉人爲禮。女不待讓而坐。立去其手套。少頃余始喘息言曰：斯人乃敢爲是不情舉動。此消息大佐胡由聞之？大佐曰：吾延約尼至家飲之酒。醉而盡洩其語。余曰：總統以祕密事告約尼矣。大佐曰：然總統良不知人。竟不料約尼之爲淺人。女卽曰：約尼果不醉亦不言。復面大佐曰：彼乃不悉君足以洞見其肝鬲。余曰：總統果行此無賴之計。吾銀行及股東固喪失於吾之害。固未見其大也。大佐及西奴林娜聞言皆笑。大佐曰：馬丁勿爲此粉飾之詞。吾及西奴林娜均知爾隱事矣。余曰：何事爲隱？旣隱汝又胡知？大佐指女曰：彼竊告我。余問女曰：君何由知之？女曰：總統告我。余曰：總統亦中酒矣。女曰：否。語時甚羞澀。以目視地。余已深知其所以。然顧亦未言。少頃卽曰：旣二君洞悉吾隱。吾亦不能終隱。且感及時之見。告使吾爲備。女曰：馬丁吾之來告不但爲朋友之情。我亦同病者也。余曰：此事何涉於君？女曰：此次國債重者屬君。餘則屬我。及大佐果總統抵賴。匪特

銀行中蝕卽吾二家亦毀。余曰：茲事吾乃不聞。大佐曰：第一次揭國債時，我已假總統十萬元。當時二人交誼良篤，總統以官餌我，卽以假資爲償。後此尙購債票無數。余曰：然則債票之值非昂乎？大佐曰：然。票值五元者，吾以七角五分得之。余曰：票上所書仍五元乎？則所得者凡幾？大佐曰：三十萬元也。余曰：以理論已有三十萬元之多，宜其徬徨至此。若西奴林娜者，又幾許？女頗忸怩，少焉言曰：誠告亦無礙。當時之許彼居此者，總統密許我十萬元相償，卽吾亦有五萬元實積。自劇場共得十五萬元，總統均勸我購彼債票，名爲十萬，實則鈞我私積五萬元而去。馬丁試思此人狡猾，甯非無賴之尤？余曰：無恥殊甚。女曰：果彼不認有此，則我甯非窮人，矧尙有始氏依吾爲生，又將奈何？大佐曰：何始氏之云？又面余曰：馬丁，吾三人均在破舟中矣。余曰：舟且立。沈大佐及女同聲曰：必不至。沈余愕然曰：二君果何術自救？大佐曰：信義者國之元氣，吾輩乃張眼見總統，逞其無賴。墜奧里塔蘭名譽耶？女曰：是安能者？余曰：策將安出？大佐曰：馬丁，吾輩當合三人之力，雪此。

國恥。因微語曰。吾輩將。句。女。不。及。大。佐。之。畢。言。卽。以。手。套。高。麾。曰。革。故。鼎。新。萬。歲。萬。歲。余。自。思。但。有。此。策。卽。起。抱。西。奴。林。娜。幾。在。吾。屋。中。跳。舞。大。佐。卽。止。吾。二。人。曰。汝。勿。狂。謬。語。洩。且。立。死。西。奴。林。娜。亦。止。余。曰。稍。靜。爲。佳。三。人。乃。復。歸。座。余。曰。請。大。佐。言。其。所。以。然。吾。知。此。中。視。更。革。若。兒。戲。惟。吾。居。立。憲。之。國。初。不。以。此。爲。易。易。請。問。其。術。我。輩。區。區。三。人。胡。勝。此。任。大。佐。曰。陸。軍。吾。可。號。召。余。曰。總。統。之。賴。吾。債。殆。以。養。兵。兵。得。餉。卽。可。爲。用。君。事。胡。由。能。集。大。佐。曰。然。惟。其。如。是。吾。故。欲。於。事。先。結。陸。軍。之。心。令。彼。歸。我。今。日。兵。皆。窮。餒。果。人。授。以。十。元。者。卽。奉。鬼。爲。總。統。彼。亦。甘。心。馬。丁。亦。有。見。金。否。余。曰。有。之。但。無。多。大。佐。曰。爲。數。何。若。余。曰。僅。有。一。萬。留。以。待。息。大。佐。曰。今。茲。且。靳。先。以。此。金。付。我。我。卽。用。以。爲。餉。並。爲。資。本。博。取。此。三。十。萬。元。也。君。試。思。擇。其。當。者。行。之。余。曰。固。如。是。又。安。知。吾。三。十。萬。元。卽。可。瓦。全。矧。大。佐。與。西。奴。林。娜。亦。有。責。負。不。求。自。償。耶。大。佐。移。榻。近。余。曰。彼。金。未。盡。第。窟。藏。之。余。曰。得。勿。約。尼。白。君。大。佐。曰。初。未。明。告。但。自。其。語。氣。中。探。之。確。知。其。有。是。事。君。但。假。我。萬。元。

事成後果欲仕者當以度支大臣相處西奴林娜汝亦謂然乎女點首稱可余曰事果敗者又奈何大佐卽自囊中出手槍示余復納之默然無言余曰知之更容我半句鐘思此重事大佐曰可吾且至外廂奉候西奴林娜亦出余獨居深念少頃門闢西奴林娜入立於吾後以臂加吾頸余引首見西奴林娜破格與余戲爲態尤娟媚呼曰約翰我賜爾白薔薇又安在還記花房中事乎余曰烏能不憶至死尙耿耿也西奴林娜曰何遽言死死豈易易吾此遭舉事務在必獲獲後句余曰獲後卿嫁我矣吾親愛之玉人而西奴林娜遂與余親吻且摩挲吾髮言曰汝爲知趣之孺子願乃非佳余曰西奴林娜汝不嫁彼乎女曰彼爲誰余曰大佐女微語曰吾恨之良深余曰吾亦不屑吾但能得爾卽推翻一打之總統吾亦并力爲之女曰汝之爲此爲我也不爲吾錢也吾心滋悅余曰吾得歸主人之錢心亦滋樂又況得汝女曰鄙哉小夫吾不與爾親吻矣余知玉人戲我女卽開門呼大佐曰馬丁如吾約矣今日尙至吾許晚餐議大事時穹司已入女曰穹司吾輩將

得財得時。汝必分我餘潤。余思西奴林娜已爲吾許。大佐則吾頸已入縵中。總統知而勒之。且立盡。願吾愛重美人而求復失金。不如是人財。且兩失。須知年少人無情。愛決不得生。非黃金亦無以自養。吾身已入博局。此時直以性命爲賭矣。惟茲事甚佳。而與大佐爲侶。其人又非吾耦。願非彼。又不足以成事。幸西奴林娜之心。向我甚於其愛大佐。余不期仰屋而思。但思西奴林娜之恩意。祛其畏怯之念。專候日落。赴彼家議舉大事。

第七章

上午余所定議。特其大略。迨黃昏聚議時。則講其細目。余在西奴林娜家議極久。女之婢氏已先期歛避。不與議。余與大佐及西奴林娜自十句鐘起。直議至一句鐘始定。其爲計大略如下。今日爲禮拜二。至禮拜五之晚。大佐結亡命者二十人。此二十人每人。予以五十員。直自誓死以前。百無所懼。是晚出不意。直抵金宮。擒總統。得其藏金之所。則盡取之。總統果不見拒。則聽全其命。果一捍格。即立死之。

大佐之意。本欲殊總統。余力爭以爲不可。西奴林娜亦然。大佐不能抗。因而許我二人。余初意亦與之同。赴金宮。惟是夕爲奧里塔蘭紀念之佳節。將士宜置酒高會。余則與列將豪飲。隱待大佐成功。大佐功成後。則以金錢散諸將。令歸心。大佐此等兵弁。雖知總統被擒。顧貪戀黃金。必不反側。而大佐又手握兵符。儘可以勁卒脅此列將。餌之以金。劫之以兵。列將既降。卽耀兵於通衢。則大事定矣。惟此數日中。萬不能漏其消息。爲總統所覺。尙防總統同赴營中。則事或未決。於是余對西奴林娜。令以術滯總統於宮中。與之同飯。女曰。事尙可爲。惟近陰險。匪我所屑。余思亦然。顧非是事。終無濟。大佐曰。狙詐之事。不能論以道德。今爲國計。不能更語其他。余曰。當日總統之詐爾金。亦未嘗出之誠懇。大佐曰。西奴林娜。果吾事成者。總統之別墅。當屬爾。西奴林娜固愛別墅。及聞利害之言。遂亦心許。因曰。以理言之。是人作如是收場。宜也。我允爾矣。大凡本非欲爲之事。經人教偪而爲之。其爲也。仍怏怏。余遂舉古來女中豪傑。以懲憚之用。壯其膽。大佐粗疏不審。大計竟

以余爲煩。言卽曰：此不過以術愚其人。汝前此固不行是術耶？女曰：爾果允，我不殺其人。吾尙可許。大佐曰：吾不嘗語爾不之殺乎？惟吾不割刃而彼敢逞兇，則吾亦不能袒胸而飲劍。余曰：總統爲人，雖奸黠，吾殊不忍傷其生事。果可以和平者，亦可以勿殺。大佐曰：汝言良然。女則太息無言。狀似允矣。於是三人復議，不復更聚。但卽隱中通書示約。余爲銀行中總辦，與貴人恆通信札，遂以余行爲總機關。彼此之書均由余達。以余來往書多人，固不吾疑也。已而又議事機不密者，則吾等同逃至大佐壁。壁去城僅七英里，咄嗟可達。卽由壁中更奔外國。大佐曰：馬丁吾但得爾萬元。此事直在吾掌握。余已挾鈔票而來。遂手授之。言曰：大佐聽之。吾之所處，狀至阡危。吾金予爾。卽欲索歸本利，必三十萬始足。於吾尤不沾唇吻。苟不得者，則毋論事之成否。吾終不能遽出此金。故必仔細更申前議。大佐曰：宮中果無錢者，吾又安能應爾？若果有所獲，則聽君先取。餘金始屬之吾。及西奴林娜此餘錢，汝亦不能與。余曰：宮中果無錢者，吾固無從得。惟新政府一立，當承此國。

債。則余亦可對吾主人而責卸矣。語後授鈔於大佐。大佐納鈔面女曰。吾與汝之條約亦宜豫定。女曰。汝不言以別墅與我耶。余曰。爲時已晚。吾議亦定。衆更飲酒爲壽。余方欲起立。復曰。約尼喀爾作何處置。彼昨夕告爾事。適在醉中。今醒後。能毋追悔。大佐曰。晨來尙惺忪。惟此時能否省記。則不復敢知。余曰。彼若洩之。總統能毋預設其防。大佐曰。無傷。彼尙處吾家。何由卽面總統。今日當以藥醉之。令勿醒。實則卽見總統。亦決不敢自承漏言。防不利於己。然終以閉置爲良。西奴林娜曰。尙有一人。尤不宜令相見。余曰。何者。女曰。卽度支大臣之女安東尼倭也。與約尼甚密。約尼雖不敢徑告總統。或告安東尼倭。安東尼倭一告其父。事無不敗。余曰。斯言良確。必閉置之。至於禮拜五以後。事始無梗。今無論他事。但吾與列將轟飲時。亦不當令斯人躡入。大佐曰。事旣如是。當禁錮不聽出。女曰。大佐何術能錮是人。大佐作色曰。和平者。酒抵抗者。刀舍此別無他法。余曰。彼與大佐并命者。如何。大佐曰。彼不能殺我。則決不能越出吾範圍。此事但屬我可也。西奴林娜又防

大佐行兇。卽曰。彼倔强者。大佐終治以何術。余固悅約尼。然愛己之心篤。卒亦無計。卽曰。聽大佐可。大佐曰。吾將歸與約尼爲伴。西奴林娜明日卽以書約總統。於禮拜五日同飯。又語余曰。馬丁。汝與列將飲。當以謔浪令彼盡歡。以牽綴之。吾輩於禮拜五日相見矣。大佐欲行。亦匆匆邀我同行。防余與西奴林娜作密語。旣出。大佐以馬歸。余亦歸寓。西奴林娜送余至門。顏色頓變。狀至震懼。卽余亦戚戚不自安。自念果得免者。萬勿投身於政界中也。彼約尼者。忠厚長者。此一禮拜中。余良不能遽保其險。卽總統者。生命亦岌岌。余天良交謫。時則思總統見詐之事。令激吾怒。與天良抗。又念去此總統。更易一人。則殊佳。顧所易者。又爲大佐較舊。統彌復不及。又將奈何。思極輾轉。不復成寐。忽念及重責已歸。玉人又得。則稍稍怡悅。入黑甜矣。

第八章

三日。中沈悶已極。爲平生所不經之日。夜亡其睡。日亦憂思。手槍無時不挾一

聞。徵。響。卽。爲。躍。起。且。廣。購。報。章。防。主。筆。者。知。而。發。論。苟。聞。童。子。販。報。高。呼。余。仍。傾。耳。而。聽。曾。否。誦。言。發。人。奸。謀。然。終。天。兀。坐。而。又。不。能。不。面。來。客。顧。容。多。踖。踏。不。能。自。禁。至。於。以。筆。推。算。但。作。加。數。亦。往。往。成。誤。穹。司。以。余。爲。患。作。趣。言。延。醫。余。則。立。誓。後。此。無。論。遇。何。等。政。體。終。以。久。安。爲。長。計。決。不。願。更。易。而。自。擾。憂。患。也。吾。此。時。之。心。敢。自。言。不。爲。西。奴。林。娜。者。必。乘。此。黑。夜。逃。出。奧。里。塔。蘭。聽。大。佐。諸。人。行。事。卽。不。名。一。錢。遠。方。行。乞。亦。所。誠。甘。願。雖。震。懼。如。是。而。乃。不。如。吾。之。所。料。時。總。統。乃。一。不。知。吾。謀。則。時。時。居。度。支。大。臣。家。商。略。至。於。夜。半。始。歸。二。人。所。謀。殆。卽。抵。賴。國。債。之。策。而。營。中。亦。無。騷。動。之。情。午。後。遊。人。蹴。鞠。跳。舞。仍。如。恆。狀。時。總。統。方。大。張。告。諭。將。清。理。財。政。以。蘇。民。困。於。是。國。中。人。人。拭目。以。待。新。猷。而。禮。拜。二。禮。拜。三。兩。日。乃。寂。然。無。事。此。二。日。中。余。與。大。佐。及。西。奴。林。娜。初。無。函。札。往。來。余。心。又。患。事。有。中。變。意。寓。書。爲。人。得。則。密。謀。一。洩。必。無。全。地。因。思。果。禮。拜。五。仍。如。不。動。當。往。訪。大。佐。探。其。蹤。跡。迨。曉。余。尙。滯。牀。席。而。厮。走。者。捧。三。函。入。言。曰。此。書。自。銀。行。來。密。司。忒。穹。

司爲主人道晨安。今日能否赴行。余語麻走曰。汝告來人。吾卽至矣。及觀三函。其上均書緊急二字。一自西奴林娜。一自大佐。一自營中武弁。余先折武弁之書。書曰。奧里塔蘭陸軍各武官。請今夕十點鐘。延密司忒馬丁到營小飲。總統以事不能至。卽大佐喬治亦以病辭。今夕主席。則爲少佐鴉風素。其下卽鴉風素署名。余心釋然。始展西奴林娜書。上曰。吾親愛之馬丁。此中附鈔票二十圓。爲我易小銀圓。爾今日不與我同飲。吾心滋不懌。今日總統延飲。以大事之故。不能不行。其下署名而已。無他語也。大佐書曰。吾親愛之馬丁鑒。約尼喀爾尙在吾家。幸無事。彼及我咸大醉。彼尙偃臥。我則能起。營中延飲。汝務一行。吾午後決能治事。余連讀三書。均平安無事。則大悅。遂起著衣。進食。至十一句鐘。始蒞銀行。道中卻遇度支大臣之女。爲余最不願見之人。彼盤馬而來。馬汗出如蒸。似行遠道者。女見余。卽勒馬。余不能遯。亦脫冠。旁立曰。女公子晨來安。往觀尊。乘似從遠道而來。女曰。十句鐘尙云晨耶。吾行甚遠。實相告。吾父本命我賣書授喀爾。乃久覓不可見。密

司忒馬丁知喀爾安適。余曰：是焉能知。女曰：彼家人言沾滯於外，可四日亦不至。樞府中議事，此正喫緊之時，何由不見。余曰：何爲喫緊。女卽色赧，似悔失言。卽曰：無之。凡在政界中，何人非忙者。度支部方當籌散餉精之時，余曰：度支中有資俵散矣。女曰：吾未之知。總統及吾翁以無人贊助，方蘊怒也。吾故晨起，覓取其人。余曰：約尼究安往。女曰：以我思之，或在大佐之家。午餐後必至而覓之。吾知禮拜一時在大佐家小飲，自是不歸，未可定也。余思女果往覓事，或敗露，卽僞曰：此人決不在彼。今晨方見大佐。大佐言約尼於禮拜二已行矣。吾性奇劣，乃不省記。大佐言約尼乘遊船赴海口，或以風濡滯耳。女曰：然其人乃大憤憤，在百忙中，何由行樂。吾父聞之且怒，但出遊涉，非復遇害。老人之心或釋耳。余曰：幸女公子遇我，釋此憂疑。語後匆匆爲別而去。心中自思：今日之打妄語，可謂協機宜也。旣至銀行中，立覆三書，書固不同，而語則如一。言晚中必蒞其報，大佐及女亦但如是。書發後，余及穹司坐談，爲狀甚窘，以生計奇劣，穹司防人索錢，詰余存款之盈絀。余但

能示之以簿籍。不能啟櫃以取其信。已而穹司野行。余乃潛取與總統大佐往來之書。聚而焚之。迨日影已西。余心焦然。惟患手槍之鏽而不靈。顧乃不敢猝試。則時時吸雪茄以鎮吾憂。及五句鐘。余遂閉吾治事之室。歸寓。易衣。每易一衣。卽自思此衣。是否著之入土。時大佐書復至。賚書者以馬至。馬亦汗淋。余識此走倖爲大佐紀綱。則躬自下樓取書。書中禍福莫辨。心躍躍而動。書中但曰喀爾。今日六句鐘。逃大抵自歸其家。似有疑也。汝見卽以槍斃之。余謂使者曰。汝知喀爾之行以馬乎。對曰。否。余曰。彼家有馬乎。答曰。彼家之馬。已爲大佐盡假而用。路遙必不入都。或歸彼家耳。余思大佐之家。去約尼家可十英里。約尼去宮又六英里。凝思不已。來人似解曰。卽行或未遠。彼左股已著傷矣。斃行十六英里。非交晚不卽至。余曰。約尼胡創。詎大佐創之耶。來人曰。大佐告我。挽留密司忒喀爾。以明日行。卽夜行。必不聽其生還。顧前數日。洪醉留之。至易。大佐以藥酖之。酖後愈醉。惟昨日下午酒醒。決言欲行。旣起。卽著衣加冠。彼所挾兵器。吾已一一檢而藏之。及下樓。

索馬。吾則告以勿行。彼乃斥我。向門而奔。吾輩乃不敢用武。幾聽之出。此時大佐適歸。問曰。約尼安往。約尼曰。汝乃敢謀我。以藥見迷。汝更阻我。卽以死鬪。大佐曰。汝將胡適。約尼曰。將至都中面總統。大佐曰。今日勿出。待汝明日酒醒。行乃無礙。約尼曰。大佐。吾身不挾一兵。汝乃握槍於手。汝果死我耶。縱爾槍。否則當聽吾行。汝行止不端。當知所備。語後欲奪門出。大佐讓之出門。遂又尾之行。可十五碼。卽以槍中其右股。約尼立跌。大聲而詈。立暈於地。大佐命吾輩裹其瘡。置之牀上。顧所傷在膚革上。不傷其骨。遂睡至經夜。余曰。創足胡能遁。答曰。吾輩咸不在家。以奉大佐命往約尼家。假其馬。大佐卻得一箋。不審得自何人。立出。及吾輩借馬歸。共十四。卽付之邏者。令徼巡。吾問之邏騎。咸言無人出入。及吾歸時。覓約尼已遁去。二句鐘之久。余曰。既有邏騎。胡能遽逃。來人曰。使女耳。接吻後。予以十金。門啟矣。逃時未敢盜馬。負痛而奔。此人亦非易與。余曰。汝輩胡以不追。來人曰。馬乏而逃。人又在二句鐘外。胡能更追。果追至彼家。彼家健僕可十餘人。法當爲彼所得。

密司忒馬丁。吾行矣。君有覆書與大佐乎。大抵大佐十一點鐘時。卽入金宮。約尼若逾十一點鐘後。則決不能入。余曰。初無他語。吾自能祕此重事。不洩於人。心中自念。見約尼以槍斃之。此事吾決未能然。又有可危者。果入宮中。約尼亦至。則事尤肘掣。彼此邇迤到營。而心甚忐忑不已。既至去外衣。僞伏而結襪。俯視。吾槍尙存與否。

第九章

是日夜飲。爲吾一生所不能忘者。列將可十員。均奧里塔蘭武弁。種類之不齊。亦爲世界所未見。中有二三四西班牙人。爲美洲之僑民。又三四巴西人。餘則均合衆國流氓。無學問者。十人中無一不醉。卽余雜於其中。亦作繁飲。而列將之謔。浪直與下等人無別。余雖醉。尙留意。但覺爲時甚久。消息不至。則省省然不可自聊。雖亦啾啾不休。而心中至明了。時時探其口吻。問總統德政。人人咸切齒。怨其祕惜餉糈。且六閱月無餉。人皆奇窘。欲驅使而左右之。爲勢至易。及鐘動十一點。消

息尙未聞。中有大尉起爲總統飲壽。衆雖從之。然皆弗樂而坐飲。余則獨起。已而少佐起爲陸軍飲壽。語已。衆始爭起。歡呼而飲。衆中有年少者。欲爲奧里塔蘭商務飲壽。亦及吾名。余起作答詞。惟不審所言。惟求其冗長。無恤其能當與否。列將亦不吾聽。時鐘動十二點。余語盡不復能言。側耳尙不聞大佐馬蹄之聲。知不能更作贅語。於勢當行時爲十二點一刻。余尙啾啾不休。而列將中一人忽高歌。亦不知其歌詞所命意。衆皆和之。余聲遂爲所雜。而人人爭起而歌。余思此必爲送客之歌。主人送客。客留何爲。遂作計引諸人之手。環長案而跳。衆大悅。咸從我。於是瓶翻盃覆。不復成主客。而菸芬酒臭。中人欲僵。余雖與之酬應。而力不自支。更數分鐘。爲勢當暈。此時忽聞有嘈雜之聲。少佐聞聲言曰。此何人語耶。余方引諸人手。則立釋之。探手囊中。弄其手槍。言曰。此或醉士喧。也。少佐曰。吾當起而鎮撫之。此事關陸軍名譽。不宜聽彼恣肆。余遂調少佐曰。吾輩亦方喧。也。乃欲止其。勿聲。甯非以賊鎮賊耶。少佐正色曰。此何言。吾當趣往。余卽出槍言曰。少佐出者。

吾卽開槍矣。少佐大怒。顧左右曰。此人痾發。汝輩趣縛之。餘人大笑。咸以我爲善戲人。時有少年人謂余曰。馬丁勿聽其行。吾輩將調弄之。至於達曉。少佐自窗間外望。月明如洗。見院中均爲兵。蔽壅都滿。余先欲觀其魁渠爲何人。少佐忽曰。敗矣。兵變也。一少尉曰。吾輩趣歸寢。勿問彼事。少佐曰。此豈睡時。汝試望窗外作何狀。於是醉人咸駢肩而外觀。外兵見之。卽同聲大呼。此聲喜耶。怒耶。則不可知。而軍官咸以爲反。欲奪門而逃。余曰。衆勿行。孰先逃者。吾卽以槍斃之。衆皆大駭。不知所出。少頃爭擁而撲余。余立出一槍。乃未傷人。但覺爭以酒瓶擲余。余立跌於地。槍亦隨擲。自知今日命盡於是矣。然張眼時。見大門已闢。第一入者爲大佐。既入。卽曰。諸公勿亂。營中固有禁令。卽謂所部曰。彼輩敢動者。死之。另以二人挾馬丁起。余此時幸不死。至大佐之能救余者。則余書亦不能不述。大佐之施設於金宮中者。

第十章

總統者才力至偉。然擯甲雖密。終有罅隙可入。但觀總統前此之行事。則貪財好色。其本圖也。乃不知吾輩今夕有謀彼之事。今夕聞西奴林娜與之並飲。則自棄軍。勿顧吾書所記之事。咸得自西奴林娜之口述。顧女之所述。但述大佐入時之事。以上與總統談讌。則祕不吾語。故吾之敘事。亦但發端於此。西奴林娜曰。時剛十一點。總統啣雪茄。坐聽西奴林娜語。忽聞有叩門聲。時侍者皆不在側。總統則自至窗間審視。吾聞言卽起避。總統曰。女勿行。吾已告闔者盡屏他客。惟約尼來始聽入。今來者其約尼矣。復聞叩扉聲。總統曰。是矣。語已門開。侍者入曰。密司忒喀爾在外求面總統。總統曰。命彼在廊下候我。我將卽彼與言。語後卽啟遊廊之門外出。正於此時。復聞有馬蹄聲。總統復止步曰。此何爲者。語未已。門外卽聞囂喊。及縱槍聲。聞大佐言曰。汝輩不下其槍者。當立死。總統立入。取手槍。復出。出後不聞其聲。但聞有槍聲。似有外人奪門而入。大佐先進。右手執刀。左手執槍。可十餘人。隨之同入。總統遂渺。吾趣問大佐。殺者何人。大佐不答。但曰。彼安往。吾指遊

廊之門。彼從此出。又聞從者曰。有人中槍死乎。答曰。傷者但有喀爾。餘人悉降。吾曰。喀爾死乎。答曰。傷重而未殊。正於此時。忽見總統立於窗外。大佐亦見。卽以槍向之曰。灰丁罕大將。汝降乎。吾所挾十二人。抵汝。汝何能敵。大佐語時。十二人均以槍向總統。總統四顧。垂其槍。言曰。大佐聽之。勢力已無可較。此謀蓄之當久。以賄徐散吾之羽翼。復以彼美。此指吾也。語未竟。吾羞極。以手自掩其面。坐於溫榻。總統復從容言曰。吾今亦不以惡名加人。須知人皆上帝所造。卽擲其手槍曰。我降矣。彼喀爾者。果死之耶。大佐曰。死生吾所弗知。神志若不相屬。總統曰。喀爾之傷。槍發自汝乎。大佐點首。總統欠伸出表視之曰。今夕當不涉吾事。容吾睡乎。大佐曰。爾寢室安在。總統指門。適在大佐迎面。言曰。此是也。大佐曰。吾當入觀。有他路可逸否。少頃出曰。吾當以兵守此。雖睡宜開其扉。總統曰。可惟吾睡時不能擾動。當留我名分所在。大佐卽麾其兵曰。爾二人當在門外偵察。另二人則居遊廊之中。出入之門。各守一人。宮門之外。吾另以三人邏守。所司者。勿令大將灰丁罕

外逸勿論。何人苟入此屋。則立擒之。勿加楚辱。總統曰。承君見待。周詳至此。汝忠心勃發。爲國誅無道之君。其蚌得毋肇自國債。大佐曰。此時非談國政時也。吾尙有他事。當勾當所留之兵。不能同行。君請安寢。勿慮。總統亦不之怒。但曰。聽爾所爲。大佐卽迴首語吾曰。西奴林娜當隨吾行。吾曰。大佐先行。吾腦方暈。少頃卽出。大佐曰。必隨吾行。吾一舉首。見總統含笑。吾起時。總統亦起。似泥。吾行。吾防總統作冷語。見砭。顧乃不爾。但曰。西奴林娜之來。爲此金乎。惟年少。閨人不宜視財。如命。汝若黨我者。不甯佳乎。吾不能答。立隨大佐出。大佐出時。言曰。今當以馬向壁門。果列將預聞耗者。勢將中變。汝但自歸。汝事畢矣。大佐遂從數騎行。吾自踽踽上道。迴望金宮之門。尙大開。地上有凝血。則約尼受創所淋者也。吾歸家後。恣哭至曉。寸心欲破。以上皆西奴林娜語也。余書今當迴敝營中事矣。列將出不意。見大佐入。則爭舍我而向大佐。余扶二人匆匆行。傍大佐。大佐曰。諸君聽之。吾最不悅者。在以勢力脅人。惟今夕事勢偪促。無暇以本末事語諸君。質言之。奧里塔蘭

之民。弗甘處於虐政之下。將起誅無道。大將灰丁罕。託自由之名。行其詭謀。其進身以自由。卽以總統之權力。滅我自由。今民間輿論。必去此暴厲之夫。請命於余。亟欲余去此總統。使民甯謐。吾既承此重責。先告之陸軍諸人。全軍皆諾。恆以吾爲是。悉願效死。今諸君身爲列將。亦將從我而去邪。從正乎。大佐語後。列將均無言。大佐復前而言曰。今日道無中立。非彼則此。非愛國者。卽爲壽國。非自由者。卽爲悖厲。而專恣。吾今日身柄此權。可以重罪加人。令死亡。亦可以榮名加人。令富貴。君輩餉精久。不給人心。滋不謂然。咸以灰丁罕之冒利無厭。故令諸君枵腹。令百姓人爭出金。請還諸君餉糈。諸君如何者。語時。出一巨囊之金錢。置諸案上。少佐鴉風。素視錢囊。又視其同伴。卽曰。我輩既爲自由。起見。敢退後者。爲上帝所不容。今惟共祛無道。而就有道。於是狼狗之兵官。皆同聲贊諾。大佐曰。諸君既如是矣。可卽歸伍。卽臨窗外視曰。汝輩勿喧。汝輩將領。咸如吾意矣。卽聞歡聲發於院宇之中。余自拭其額汗曰。茲事竣矣。後此之事。吾亦不煩瑣以瀆觀者之目。此時

列將各率其伍歸壁。而天亦遲明。消息已四播。迨兵過時。國中老壯婦孺咸聚而觀兵。亦不知其所以然。但有稱頌。頌聲蓋出於不得已也。大佐與百姓略示大意。言後此身家及自由。咸純全無失。又言政府已易人。吾即代表政府者。汝輩亦當以赤心事新政府。果懷不軌。刑且立及。復出示安民。又以兵行邇。大佐部署後。謂余曰。事定矣。當至金宮中部署彼人。余曰。然。此舉蓋爲金耳。今當以得金爲上著。余至金宮時。宮門肅然無聲。大佐所留之邇者。尙荷槍往來於門外。既入。見司宮者方洒掃門宇。又以布拭去血迹。昨夕方毀門入。即見一匠氏方以斤斧修門。尤有醫生馬車。停於門外。余曰。醫生之來。爲喀爾之創來乎。語後即下馬。以馬付從者。甫入門。已見醫生。軀幹至短小。然頗臬黠。名曰安得生。在流輩中。至有聲譽。人咸知與總統爲友。乃無人悉其爲憲政黨及反對黨者也。一見大佐。即曰。適有一事。方俟大佐將令。即爲密司忒喀爾事。大佐曰。喀爾死耶。果死者。咎屬自取。醫生不答。但曰。未死。惟此間囂雜。吾意將移置吾家。大佐曰。當令其出矢言。勿逃去。

異國。醫生曰。卽令殺彼。彼亦不能自逃其命。今方偃臥耳。大佐曰。汝可將去。惟愈後當告我。我將與言。惟人旣屬爾。則責亦在爾。吾將向爾索人也。醫生曰。可。大佐曰。行也。又語余曰。吾輩且往面灰丁罕。余曰。先索吾金。續再與言。大佐曰。此何足言。惟吾距此十二句鐘。湯餌未沾唇吻。今當一飽。更言其他。時有侍者。聞大佐言。卽啟曰。晨餐垂畢。余遂及大佐至餐房。陳盛饌於案。食旣。卽問大佐曰。見總統後。何以處置其人。大佐曰。以槍斃之。余曰。無罪何能死其人。大佐曰。禍國殃民。以私害公。余曰。此罪安有確讞。大佐曰。私蝕國帑。足死之矣。余則極力諫大佐。勿出辣手。意能與余無害。復能保全總統。當以死力爭之。大佐沈吟曰。見灰丁罕後。更言善後之事。大佐遂起燃雪茄。視鐘已七點。卽曰。一餐之王。乃延至一點之久。於是余隨大佐至總統寢室。大佐所留之巡兵。各據榻坐。雖未鼯寢。然神氣索然。蓋一夕未交睫也。見大佐。咸起立爲禮。大佐曰。其中無少動乎。答曰。然。總統尙酣眠。大佐徑入屋中。尙沈黑。大佐開奩納陽光。見總統尙寢。微有鼯聲。大佐曰。此人臨危。

不亂。奇人也。余見總統裹白布於頂。心中頗以爲奇。大佐疾趨至榻上。大呼曰。總統遁矣。此約尼喀爾也。余視之良然。屋中乃無總統。大佐卽促醒約尼。約尼張目曰。汝胡鹵莽。至是不知吾被創臥耶。大佐曰。汝乃大奸狡。灰丁罕安在。約尼曰。大佐及馬丁耶二君無恙。吾昨日頭顱爲野獸所噬。大佐仍把其臂曰。灰丁罕又安在。余曰。大佐彼負創且恕之。大佐釋手而大怒。口中申申而詈約尼。微哂曰。總統行耶。大佐卽出門外。謂巡兵曰。汝釋總統乎。巡兵大窘對天立誓不已。且聞總統潛逃。亦怪駭無已。卽曰。吾守此門。初不見有人。屢入屋中。亦無聲兆。此數人爲大佐心腹。旣聞矢言。卽亦弗疑。復至屋中。約尼曰。大佐咎不在彼。吾入時不經此門。汝至牀背。試觀此中。尙有一門。吾卽由此而入。當時吾神思已昏。亦不審其所從入。余果自牀背覓之。得一門。門開有梯。級而下。出後門矣。至於約尼之入。何以無聲。則爲狀殊怪。巡兵亦入而言曰。吾輩雖不入門。然十餘分鐘後。必一內瞭。實見總統偃臥。勿動。第一次見之。則著號衣而睡。更視之。則已脫衣。吾輩方疑脫衣。何

速心則不疑。其有變。大佐曰。穿衣。寐者。總統脫衣。卽喀爾耳。又曰。脫衣約在何時。巡兵曰。在二點半鐘後。適醫生來時。余及大佐咸大悟曰。醫生耶。巡兵曰。卽爲安得生。大佐曰。汝胡不預告我。以醫生來此。巡兵曰。醫生未入。是間。醫生但進屋之外間。取白蘭地。我亦同進。移時又至。但此而已。余恍然大悟。總統之逃約尼之入。均醫生謀也。大抵醫生知此祕門。當入門。與巡兵作瑣語時。總統已潛啟其扉。尤知巡兵時。時入視。故代之以喀爾。用釋彼疑。殆第二次取酒。蓋察巡兵之生疑與否。無他意也。大佐痛恨醫生。僞以總統爲喀爾。昇之而去。自念行必不遠。果爲吾得決無生全之倖。遂進閣者。問醫生之所以行。閣者曰。密司忒喀爾。周身裹之以氈。旣登車。卽疾驅而去。大佐曰。所行何嚮。閣者曰。向海口行。大佐思自宮門至海口。僅二十分鐘。卽上馬追之。余亦以馬隨行。顧爲時已晚。立於石步。見半英里外。有船張帆乘微風而趨。此卽總統遊船。其上尙飄國旗。二人相顧無語。然見風雨表木桿之上。有人張告白。多人圍觀。余同大佐卽而觀之。果總統書曰。奧里塔蘭。

總統馬格司灰丁罕以五千元爲獎賞。國中人能將大佐喬治及約翰馬丁生獲。及其尸者。予之以此。此二人謀爲不軌。性命財產。宜屬之官。果有窩藏之人。當以國法從事。其下卽書總統馬格司灰丁罕諭。

第十一章

余一見。知此人在逃。吾輩勝負尙未之定。古有勿里恩司者。亦不容於國人。而出奔後。竟以外兵入平大難。復其大位。今以灰丁罕之才。較勿里恩司者爲長。胡能抑抑而終。然余志在恢復。吾金無懼總統之新舊。大佐之意亦然。追既不及。遂並騎歸金宮。既至。遂檢藏金。徧覓乃不可得。自念此巨金。豈攜之同遁耶。余心不畏總統之逃。但防藏金羽化。至於傾筐倒篋。一皆無有。大佐卽以人至度支大臣家。而父女亦均無見。既不得金。但取其簿籍而至。余心大窘。卽取雪茄吸之。距坐榻無言。自念助人爲亂。終乃不得勝。著吾生其自此毀矣。大佐以怒目矚余。似金之不得咎均。在我。正於此時。西奴林娜入。余亦鞅鞅不能爲禮。女聞總統潛遁。則駭。

不可止。顧神宇間尙安謐。及余告以不得金之所在。女大笑。吾蠢曰：宮中空廊如是。汝安從覓之？總統卽行。胡能陳金錢於几。聽爾坐拾。汝欲得金者。可隨我。卽引余及大佐入約尼臥處。約尼方醒。西奴林娜進而問訊。語後。卽曰：吾今將震驚足下。然但安睡。吾小頃卽已。房中有度閣。其上有小櫥門。凡人盥漱之架。上恆有此櫥。余初來亦不措意。女卽推開櫥門。中亦無物。女卽牆上以指按之一物。立啟。中露鑰寶。西奴林娜曰：彼必挾匙以行。君輩可覓巨椎至此。椎至。西奴林娜卽就牆上椎之。僞牆立毀。中露鐵櫃。其上書曰：賊無奈言賊至此。無可奈何也。顧吾輩非賊。力以椎啟之。可十分鐘。櫥啟。中儲金錢五十萬元。余一見卽大悅。余思船塢之金半在此也。約尼曰：汝輩何爲。余曰：吾方爲賊。於是三人同攜鐵櫃至外。余曰：今如何者？西奴林娜曰：此何待言。大佐不言。先歸外債餘錢。我兩人分之。大佐不能食言。卽曰：馬丁運佳。得利多矣。余曰：立約固不可毀。且大佐無我萬金。何能成事。大佐無言。余遂取三十二萬金元。言曰：今得此金。吾憾方釋。大佐分餘金一授西

奴林娜一自取之。西奴林娜曰：前此債票吾已焚棄，惟大佐允我別墅，幸勿忘懷。大佐不悅曰：胡能不憶爾二人，但知得金而已。而我輩所處地爲狀尙危，乃弗知耶。余曰：然國家大事亦宜急圖。女曰：汝旣謀國事，我何預焉。大佐聽之，我決不懷貳。女遂與大佐爲禮，余送之門。女微語曰：此人令人難耐。約翰得間，卽至吾家，語已挾金而去。余復入與大佐同坐，言曰：西奴林娜何由知此祕，大佐曰：必總統語彼以祕。余覺大佐微憎，亦不更言。遂及他事，願吾書非爲奧里塔蘭編史。國之隆替亦不煩言。惟國家不可無君，大佐遂執總統之權，防新政府初立，民心皇皇，遂以軍律治城人。大佐亦以余名入樞府，凡屬財政，悉余當之。大佐曰：吾之所以能號召黨徒，金也。今乃匱乏，至不可狀。且奈何。余曰：然可張以告諭，示國人以前總統侵蝕國帑，故資財不給。今俸祿且從省約，迨國事大定，則仍復其初。大佐曰：然今當往拊循列將，實則新附之夫，人心未定，更得一萬元以施予，或可集事。余曰：此亦至良之法，卽我所得之金，亦當告君主者。時爲十二句鐘，余遂自宮中出。

街上邏兵已解嚴。然尙有一二駐於要隘。城中店戶尙安堵。然頗有議論。至宵來事。余與其中人亦稍稍知之。中有報章言自由復再見於今日。贊美大佐言逾其分。其中尙及余曰。有某英人助余國家爭歸自由。然雖及余。余頗不欲自銜其姓名於人國。遂徐徐至銀行。穹司方獨坐無聊。賴余遂以昨日事告之。言總統將負諾。余不得已。遂有昨日之事。穹司聞之。頗爲太息。言乃不識總統之鬼蜮。及見余舉金歸。則又爲余伸賀。言總行知之。必酬君以重貺。余曰。吾惡敢求分外之得。且主人恆不直我。尤不欲告之總行。以大佐堅訂勿言總統敗行。防失國家令譽。故借第二次國債。乃不告之總行。但言存之外間。以是中亂作。乃亟取而歸。穹司曰。然則前後不符矣。余曰。穹司爾太忠實。茲事我自任之。穹司者果忠實人也。眼見金歸。則百事都不之問。午餐後。余忽憶與西奴林娜約。則取冠且行。穹司忽入言曰。茲有書爲一童子將至。書函已污。且小。書皮所書至潦草。折之。則灰丁罕總統書也。余大震。讀其書曰。親愛之密司忒馬丁。吾與爾相識久。乃不知君才如此之

巨。吾臨行時曾出示捉君。行甚悔之。果以君之才。更能助我復辟。則與君盟好如初。尤知爾欲娶西奴林娜。顧大佐亦垂涎。是女今大權已歸。大佐恐彼姝不易屬。汝也。吾勸爾擇善而從。待吾再入國都時。汝欲從我。不特必無其事。且瀕於危。今吾舟離此五英里。爾若從我。可卽至。否則以爾爲頑鈍不靈。幸勿滋悔。汝天分高。萬勿失此機會。下署奧里塔蘭總統馬格司灰丁罕。來書固稱吾才。然復改行從之。則又非便。余於前統初無恩怨。其助大佐者。本欲歸吾故物。並以贊助西奴林娜。余果從總統者。則必將已復之金。填彼慾壑。且總統亦心愛西奴林娜者。與其與總統爭之。不如大佐爲易制。且更助總統者。尤屬懷貳。非丈夫所爲。不如仍助大佐。然亦不以總統之書示大佐。但作書與大佐言。前統距此僅五英里。可善爲備。書作後。卽奔赴西奴林娜家。余一見卽曰。適得前統一書。女曰。知之。彼亦有書與我。曾述其事。余曰。總統亦有書至耶。女曰。書詞極短。似復怨我。余曰。此在意中。惟吾書汝亦樂觀之乎。女曰。然。吾授書。女讀旣言曰。汝意云何。或從彼而棄我。余

曰。此事胡至是。卽爾亦可勿問。惟爾書能否示我。女曰。否。彼之私言。吾不能表暴於人。余曰。汝不觀來書言大佐欲圖汝乎。女曰。汝未來之先。大佐正在此。將求婚於我。惟此人非柔鄉中人。較汝遠甚。余聞言而樂。卽坐女旁。執其手曰。汝不愛大佐矣。女曰。匪有半星之情。懷惟爾爲我成茲大事。然大事固成。而爾我之局較前尤危。總統固有力。幸未有暴厲之舉。勝於大佐。適大佐在此言下。禮拜之。今日卽成禮矣。余大怒曰。吾將觀彼願力能否成功。女曰。然復大舉推翻大佐乎。余曰。是安能料。女曰。愚哉。汝有何力。余曰。汝以冷淡之語對我。殊不洽於情懷。女曰。約翰汝怒我矣。我安得不憤。然卽憤何爲。余復抱而接其吻。則私語之曰。汝愛我恩深。女點首曰。釋若手。實告爾。世局無定。好事果成。固佳。卽不爾。汝亦勿自怏怏。余曰。此何足慰我。爾果愛我者。胡不同出是非之場。女大駭曰。同逃耶。汝所言得毋如小說中言。蕩女私奔事耶。吾生平務實。凡宜言而不宜行者。我決不之欲。況爾我安得有錢。出時何以自活。余曰。語及於此。吾囊誠空。女曰。吾固有之。正不能多。但

足償責而已。余曰：吾固有三十萬元。然實不敢染指。女曰：約翰容再圖機會。惟有一事。吾足許君。大佐者。吾決不之許。將來果爲勢力所逼。至於私奔。吾亦無可如何。今茲則決不可。余曰：爾於前總統。何如。女似沈吟。言曰：約翰斯人。大不易與。汝當以術勿令我與彼相見。女此時甚張皇。余思總統之爲人。至有智力。若西奴林娜之慧黠。尙爲彼牢籠。至是初意欲問以與總統交誼。何若。願以焦煩之間。至不能問。已而拊慰之。女少定。麾余行。且言曰：爾我當極力肆應。此兩總統。汝金得返。吾亦不爲無功。爾當助我爲理。實告汝。天下希望深者。失望時愈難自遣。幸爾年少。不患無排遣地。余鞅鞅且行。聞此臨行之言。頗冷如寒冰。又思大佐果圖娶者。吾力又奚能敵。果以前總統之力。敵後總統。又拒虎進狼於一身。胡益卽圖私奔。非得金。何由自活。果食貧居賤。此事又非西奴林娜所能。

第十二章

是日之晚。余心緒潮沸。然睡尙安貼。此等沈酣。殊一禮拜中所不經有者。其最愜

心者。故物已歸。聲名幸保。又思大佐果卽眞。則度支大臣。或且屬我。亦佳事。顧此夜殊適。明日噩耗至矣。遲明間。余尙寐。大佐忽至。旣坐。言前日所出告諭。均爲人塗抹。且以前總統告諭加其上。至於何人所爲。問之邏者。咸言未見。而前總統銅象所立處。亦有大告諭在焉。大佐曰。此間果有奸人。胡能不爲邏者所見。吾思兵隊亦當與聞吾事。吾已悉調前軍歸營。另以他兵代任其事。然亦難必其不懷貳心。且吾今日問鴉風素以兵間消息。鴉風素言必得錢。始足以安軍心。余曰。是必爲此。然大佐又安得錢。大佐曰。我固無之。必爲彼所擯。則前此所歸之三十萬金。必當見假吾用。余方著袴。卽止而注視大佐。大佐驚曰。汝擁資。乃不吾假耶。神氣至暴厲。可怖。余亦大恨。自思已成議。此金須歸總行。遂卽著衣抗言曰。大佐。我實無一錢假公也。吾果不爲錢者。鼎革之事。吾何必與。大佐曰。爾太無情愜。余曰。此無可如何事。萬不能冒用人資。以結大佐之歡。大佐乾笑曰。汝當時以金假人。亦果出之正耶。余內愧不能答。亦不之答。大佐曰。馬丁。吾容爾一日。好自籌之。吾非

用武。惟非假金。事且無濟。余知不假者。不可得。計廿四點中。或得他策自救。卽曰。容吾思之。此事既助公成之。胡能半途坐視。且待明日。更爲大佐圖之。時余衣已竟。卽延入餐房。飲以咖啡。大佐曰。尙有一事奉白。爾亦知吾將行婚禮乎。余且食。且僞爲無知曰。百忙中。乃復有此夫人爲誰。大佐笑曰。汝勿行僞。但一思卽可得。余曰。其馬丹地瓦。其乎其人。良佳爲年。與大佐匹。大佐曰。汝乃不知爲西奴林娜。耶。余曰。彼耶。吾固聞之。彼允大佐乎。吾言固欲探其誠僞。願大佐鹵莽而妄言。亦時留其罅。卽曰。彼語我。初不愛他人。余曰。彼不愛前之總統耶。大佐曰。彼方恨此畜生。余初以爲彼與總統。固有愛情。今茲問女。乃大笑。力言其無吾故。知茲事成也。余幾失笑。則以茗盃自蔽。復曰。婚期何時。大佐曰。下禮拜六。余曰。迅乃至此。大佐曰。然已訂定時日矣。余大驚。自思此言。西奴林娜欺我。或大佐爲此僞言。母乃兩人均相欺耶。然亦不敢爲失意色。以動大佐之疑。卽曰。吾今將至西奴林娜家。爲之致賀。大佐似不悅。而亦不能阻余。但曰。彼方告我忙甚。願以君造訪。必能拓。

其數分鐘之久。款君也。吾今欲取此毀論之人治之。余曰。大佐今日不治公事乎。大佐曰。汝言公事。詎卽政府中善後之事。顧今日乃無暇及此。必先娶西奴林娜。及得錢。然後動。適所云假資事。爾當自諒而爲之。大佐既行。余鬱氣爲之一舒。而心中已決。非萬無可如何者。美人黃金均不脫手。而授汝。幸尙有一日可圖。立謀所以抵彼之法。今往面西奴林娜。爲時似驟然。非面是人。莫可遂行。路上累遇相識。亦聞無數異聞。第一節言度支大臣父女。莫知所適。且言二人均爲醫生。安得生誘逃。居於海上。第二節則聞約尼尙偃臥金宮家中。奴僕亦皆歸降。新政府。此外則大佐閱兵。而兵間與大佐忤。有兩宿將。皆美國人。已遯跡矣。余思國且大亂。余詎不能逃。所恨黃金及美人不能同攜而去。雖與大佐立誓。屬心新政府。顧大佐冒利。將吮吾金。則吾亦何不可食言之。有爲今日計。能挈美人同逃爲上。次則但貢美人於舊帥。大佐小人。不足謀也。時已至玉人之門。見西奴林娜。顏色甚戚。似曾痛哭者。一見卽曰。約翰。汝行次。見吾舅母乎。余曰。未也。女曰。今日特令老人

外出遊散。以都中紛擾。老人見之惴慄。吾故告之大佐。令出開涉。余曰。嫗又安往。女曰。家也。余乃不知嫗家安在。聞既歸矣。則亦不問。卽曰。嫗行。但汝一人獨居矣。女曰。然。以我獨居。於勢非宜。惟當此紛擾間。求保吾資。卽不能兼及吾望。百計思之。以慎保吾資爲上。若名譽者。固在人爲。余曰。然。則爾之金資。悉令密昔司加林登載去乎。女曰。然。舍還責外。但餘五千金元。余曰。此事大佐知否。女曰。彼焉能知。知之必不聽行。余曰。黠哉。吾甚欲得此人。悉載吾金以去。女笑曰。汝行中。金多。能挾之同行耶。余曰。然。吾金具在。固非鈔也。惟嫗以孤身遠行。道中得勿爲人所劫。女曰。果男子稍有知識。決不劫及女流。余亦不言茲事。卽舉大佐所言。一一述之。西奴林娜女聞言大怒曰。此人狂謬。乍來。吾以禮款之。初未言許婚事。約翰汝亦信我有是言乎。余曰。是焉能信。卽不信者。何補於事。設吾明日尙在此間。吾金決不能保。大佐固將甘心於我。女曰。彼匪特奪金。且將劫我。今惟有力去。此人爲當。余曰。欲逐是人。必得舊帥之力。願舊帥之來。吾金既亡。汝亦弗保於我。究何利者。

女曰。以兩人較之。頗以舊帥爲佳。語至此。見余跳躍而起。卽曰。約翰勿怒。吾非愛彼第就爾言。軒輊此兩人甯有他意。汝言固然。卽反正亦不足救我之困。余曰。不惟此也。機事不密。身且糜爛。女蹙其雙蛾。言曰。待我思之。余曰。容我吸煙助爾謀畫如何者。女稱可。於是二人對坐無言。然余見女狀未籌畫也。似定去留之計。有時視余而歎。余煙盡。擲其蒂。自至窗下。外觀少頃。女呼曰。約翰。余卽近其裙邊。坐於地。衣之上。執手向之。女熟視余。面曰。以我之身與爾金較。甯去我去。金耶。余不言。力親其皓腕。以代答詞。女覺曰。失金則爾忝其職。汝名譽墜矣。余曰。此意中事。女曰。汝並名譽亦輕之矣。余曰。非輕也。天下孰願爲人唾棄。然以汝較之。則失爾較吾名爲尤重。女曰。約翰。汝眞如是悅我耶。余方欲立誓。女止曰。勿須。吾信爾矣。約翰。吾尙有言。奉白。汝不至是者。吾已嫁前總統。所以逗遛灰丁罕者。卽復爲此。故盡以吾資。購取國票。後此汝當了了。知我與爾交情。逾固。遂變其初心。後此總統求婚。吾時以計緩之。及吾資窘。與索逋負。總統乃不吾應。言藏此金。以與密昔。

司灰丁罕於是吾心滋恨乃不敢明絕其人其人梟訐不易制也後此常與爭競必先得金而後議嫁總統亦怒謂必成禮然後言金以此之故久久相持願乃不疑爾之乘間而入即使知之亦在垂敗之時尋復知總統有堅悍不還之意且復疑我兩人吾故趣大佐定策於爾家否則亦不即發蓋前此一日總統之言乃甚厲謂吾曰西奴林娜吾年垂老不能待汝今知爾與馬丁私訂情好吾聞言大怒與抗汝亦知總統何爲者余驚曰總統何爲女曰彼猶笑不止令人莫堪吾遂與大佐聯盟合爾遂帥少頃復言曰前帥之陰毒左計吾悉得其迹故因勢而圖爲力甚易今大仇已復而後人乃厲於前人吾乃悔之不已語至此遂哭余力慰之

女曰吾非畏大佐也論其謀勇遜於前帥前帥且不之畏甯畏此獠惟前帥尙可

以利害言而大佐乃蠢蠢如鷲獸吾將何力制之則此地萬無可駐汝若不爲吾

謀則吾惟有逃依前帥余曰大佐之罪應死吾一日必以手槍盡之女曰汝言留意惟今晚必行非從汝者必入總統舟中余曰汝必隨我女曰逃將安往余曰必

出此地爲第一著。至所赴之地，尙爲第二著。女曰：其道安出？余曰：汝坐而止哭。汝哭吾且不堪。我自衛自脫，遂抱女至溫榻令臥。此時雖痛恨大佐，顧亦不思處置其人。但圖逃法已而得矣。女見余得意，卽曰：約翰汝得計乎？余曰：計固有之。惟汝當諒我。今夕當犯辛楚。女曰：汝第言之。余曰：汝知吾銀行中固有小火輪船否？今夕決無星月，吾但能上船啟程，可兩句鐘。彼輩追已無及。幸吾船駛行五十海里，卽至外國，定可無事。至於後事茫茫，亦但能行乞而已。女曰：吾於五千金元外，尙有餘資，所患登舟之難。總統海居見小機船行，安有不窮追者？余曰：此著吾乃未料。爾能否與總統通書？女思久曰：可。余曰：汝言彼信汝否？女曰：未可知也。以理言之，似或可信。余曰：然則姑試吾運。卽見獲，較之窮居於此爲佳。前此吾助大佐傾總統行事太轟，今茲已成因果。女曰：吾亦不料大佐之險暴，直至於此。余亦無暇咒詈吾仇，但趣西奴林娜作書，愚總統爲計固險，而女作書時不審惡大佐耶？愛我耶？乃慨然見答。後此復聚而商酌，時鐘已動十二點。女曰：此次之逃，能挾少

金行耶。余曰。否。果挾資者。險乃加甚。蓋取金。不能不歸銀行。大佐分布邏騎於外。且挾金行。金非吾有。主者既不恩我。我何爲爲彼全金。今暫能用爾之金。待我生機。惟今日吾至爾家耶。女曰。否。以吾家廝僕中。或有人得大佐之賂。動靜爲其所覺。但以一人潛蹤自行爲佳。汝在自由街尾候我。余曰。可。決計以二句鐘爲期。惟勿行通衢。但沿城僻路繞行。就我。汝囊中挾手槍否。女曰。有余。曰。可。惟幸勿用此槍。果用者。當立殊其人。吾行決不再至。汝自珍重。女點首。余曰。今夜午仍在吾寓。果有意外之變。汝以御者停車。吾之對鄰。吾卽如得爾書見告也。女復稱可。余曰。總統之書可立發。女曰。如約。卽磨手以代接吻。

第十三章

余自至奧里塔蘭。有兩日至不可堪。一爲逐舊統之前一日。一則今日耳。幸今日方摒擋行事。非若前此之坐而震懼。余今夜首著。卽在海濱之機船。余往看船時。檢囊中金錢。但有九百五十員。吾產盡於是矣。自亂後。余常挾此而行。以便外遞。

但以金計。尙足支撐一時。後此則但有聽命而已。此時心緒。但能挾玉人同出此關。遂亦不萌他望。至於奧里塔蘭之大局。銀行之後事。余一一付之無何有之鄉。此小汽船者。至輕便而靈警。一人足以駕駛。船中本有一人司之。余則召而問以今夕海上風信。船人曰。海波尙不卽生。但恨無月。余思夜黑無風。適便余遯。卽曰。吾明日將往取魚。必以夜行。船人大異。以余素不嗜釣。胡以有是雅懷。卽問余曰。先生以何時行。余曰。二句鐘卽啟橈。船人曰。吾可隨行乎。余僞爲思索久之。始曰。汝可勿行。汝但整吾舟。停於步上。吾自駕駛此舟。惟無人司舟。能否爲人所得。船人曰。此時安得有竊舟者。且岸上警兵周巡。決無意外之變。吾今鑰舟門。以匙授君。可也。余曰。善。卽予以金錢一枚。船人得金大悅。卽曰。必爲先生整飭舟中物事。余曰。汝可勿守彼間。吾或不時至者。苦汝矣。船人曰。諾。願先生多獲魚而歸。余旣離石步。卽至金宮。大佐見我大異。以爲未至明日。乃以金往。余曰。此來卽爲侵晨所約之事。大佐聞言。舍其事弗治。坐而聽言。吾思欲作妄語。不能以嘖嘖出之。彼

一懷疑。吾事且立敗。願自問。辭令頗工。而大佐之明。又不如前帥。吾事決不敗。大佐曰。吾思爾必悟事機。不如前之執拗矣。余曰。吾金似不能奉假。大佐怒曰。既不。予金。至此。何爲。汝知兵果。一日無餉。安能事我。彼輩之鼓噪。卽在明日之得餉與。否。果無金者。不特不聽吾令。且將以子彈相答。余曰。大佐勿怒。待我盡言。大佐曰。吾尙待汝言耶。汝直來戲我而已。實相告。汝卽不授我。我自能得。汝當自恤其命。余曰。吾來卽獻是策。君言卽吾意。大佐驚曰。是何言。余知大佐中計矣。卽曰。君欲我取銀行中金錢。奉而授君。此決不能。蓋主者之命。我司此金。防吾糜費。顧不能長保。不爲暴客所得。今大佐需金孔急。胡不於今夕僞爲綠林豪客。攻我銀行。攫去此金。不甯佳耶。大佐曰。汝乃出此謀耶。余曰。但有此謀。足以兩全。大佐曰。此策果爲歐洲所聞。言奧里塔蘭新政府行盜剽事。吾國尙足立乎。余曰。大佐胡不悟此等事。何待親行。大佐曰。非我親行。苟爲不逞。所得吾事。亦敗。余曰。大佐必親行。亦可。但須易粧而出。吾今教大佐以術。晚中發令。言前帥尙居海上。防中變。當以

兵堵之。悉調巡兵赴海峽。然後精選心腹之人往攻銀行。彼中但有穹司一人。萬不能敵。卽以少人往。法亦當勝。先勿用武。但叩其扉。穹司必自啟。關初不料。君之行。却但入時。勿殺穹司。閉置一室可也。然後直趣藏金之所。此爲鑰匙。授君可也。或縱火焚屋。亦佳。大佐大笑曰。孺子。汝乃有才。出吾意料之外。余亦僞笑報之。然仍作欲言不言狀。大佐曰。汝意欲云何。讀吾書者。當知吾非行盜。不過欲得玉人。但不能以正言奉答。答之將生大佐之疑。乃僞與議價。余必欲得三萬。而大佐慨諾。余又知大佐特妄許耳。大佐忽曰。汝試思。吾方行劫。彼舊統能否乘虛登岸。余亦愕然。思此蠢人。乃亦有此智計。卽以他語亂之。曰。無虞也。彼人卽欲反正。而兵皆大佐所屬。又何能爲。雖兵間亦有屬心於彼之人。願能得金。則亦不思前帥矣。大佐曰。兵心多貳。吾頗戚戚於懷。余曰。大佐勿憂。更二句鐘者。彼當瓦解。大佐曰。何也。余曰。銀行中旣得金。卽下令明日散餉。尙何人起而爲難。大佐曰。然此等人。旣不愛我。亦不愛彼前人。但得錢卽已。余思此語良悖。舊帥果至。但一開陳。兵心

當立時歸附。大佐蠢蠢不悉總統之才。故輕之不爲備。卽曰。卽此而行。且以人至兵中。以酒勞之。余曰。佳哉。是舉。大佐曰。卽使總統登岸。而兵將咸醉。亦決不爲吾害。余曰。吾行矣。吾今尙須以書告主者。措置此三十萬金。大佐曰。馬丁。汝陰險。至是。將來必有雉經之日。余曰。吾罪當縊。想大佐必不死。我尙欲於大佐行娶之日。作大跳舞。旣而曰。爲日迅矣。一禮拜之。王玉人已至。大佐曰。今日爲禮拜。更逾六日者。吾幾忘其期。余旣退。竊自語曰。汝尙思逾此六日耶。卽我今夕之事不成。而總統亦必以夜闌歸。汝事敗矣。大佐者。爲利所昏。竟中吾計。直出意外。後此自思。總統得西奴林娜書。至耶。不至耶。惟西奴林娜之與前帥書讀者。當未之見。吾尙有稿在。卽錄於此。書曰。吾自思今日。卽貢忠言。公亦不能信矣。前此之以計逐公。亦公之偏我過甚。故至走險。凡公窟藏之金。多半屬諸馬丁。歛歸銀行。今大佐復欲此金。馬丁不可。大佐思以兵力劫之。所挈之人無多。大兵均不動。仍居壁間。吾已值得大佐。於二點鐘時。以二十人往。至於總統之能否反正。吾不敢知。是問兵。

民均屬心。故君不屬大佐。大佐前日偪我嫁彼。違則將加橫逆。故吾之望。公直如望。歲公但能以小舟赴岸。直無人知。凡吾所言。語語屬實。但得公歸。凡有所言。匪不踐諾。用贖前此罪狀。馬丁及大佐亦有違言。公歸亦可得馬丁爲助。其下則署名。余思此書一去。總統必歸。矧總統平日以行險見長。即使不以女言爲確。亦將偵探其動靜。余初慙西奴林娜。澤之以甘言。而固不吾許。即末句亦出於不得已。或近於僞言。幸總統來時。吾二人已行。亦不能責西奴林娜前言之不踐。至於總統果歸。此勝彼負。其事全屬之天。無可豫斷。余心則一無偏倚。但祝其極力苦戰。則吾二人或可倖脫也。惟心中懸懸者。穹司忠梗。見盜而鬪。則我雖不殺穹司。穹司之死。實出於我。此節殊怏怏耳。顧余雖力勸大佐勿殺穹司。而大佐暴厲無倫。又安能顧及生命。而從者更無容議。余自問穹司。良非吾友。然以自脫之故。竟累彼人。中心爲之愴然。既歸自金宮。道遇穹司。遂引至僻處。作閒語。後復微告之。曰。吾方歸自金宮。大佐語我消息。爲機甚險。大佐言窮民至多。政府不與以餉。云

將劫取銀行。吾今請大佐以巡警時時邏守行之左右。且語大佐言。吾爲外商。果有不測。則責任當以貴國承之。大佐者代表政府者也。已極力許我矣。汝聽之。果有意外事。汝幸勿以性命與拒吾金。既有政府保任。徒傷性命。無庸也。大佐尤言。汝與賊鬪者。則與政府無涉。吾今夕或不至銀行。此一言。汝當留意。但責成政府。勿與賊抗。穹司稱可。且以余爲遠識。余遂別穹司。自念今生能否更見是人。但願吾身行後。穹司亦能去此亂邦。則彼此都幸。

第十四章

晚中天氣尙清。有星無月。尙可辨色而行。惟數十步外。卽不了了。余自慶運佳。則以酒自勞。迨鐘交十二點。納手槍於囊。徑出寓門以外。經銀行。見有數人。狀似巡警。又聞有喧笑之聲。知大佐命兵間行樂也。余徑赴石步。船已停於步次。爐火已生。余卽起棹。但繫以繩。備臨時出駛。余閒步至船塢。見有二巡兵方在守望。余曰。衆方爲樂。大佐乃多心備及前帥。前帥又安能歸者。願亦不更與言。徐至林下與

西奴林娜約會處。地去石步可半英里。一路林木蒼鬱。行道乃無人見。余待至數刻。乃不見西奴林娜。但聞醉卒呼囂之聲。已而漸見有彪形之人。隱隱都入林下。中有數人。則約尼廝僕也。余思衆方歡飲。此來何爲。是必總統之人。潛蹤登岸。隱伏於此。由是以觀。則總統之歸必矣。嗟夫。大佐汝以計奪我巨金。更二句鐘者。汝黑白當立見。余俟至二句鐘。焦竦不可耐。忽見有瘦小之人。步步狼顧。向余而來。余知爲西奴林娜。乃顧余不之見。余則微呼其名。女聞聲。卽近余曰。無他故歟。語時聲促而氣咽。余曰。他均無恙。惟總統已歸。不久大禍且作。遂引至陰僻之地。言曰。待此伏兵過後。吾輩乃出。西奴林娜忽遙指曰。約翰。此誰氏之聲響。時人影尙可辨。適有微風。送一人號令之聲。令曰。汝輩勿動。待我令發。汝輩始行。女失聲曰。此總統聲也。余曰。且靜。苟爲所聞。吾事不已。敗乎。然女已戰慄不已。余至再撫慰。令其勿聲。此時忽見有數十人。唧枚整疾向銀行而趨。余曰。此大佐兵也。而總統亦將於此時接戰。吾且瞪目觀之。此時微聞有叩門聲。已而大呼擁入門內。余曰。

穹司果格鬪者敗矣。正於是時。而林下伏兵。聞號令曰。出。遂見總統執刀指麾。五六十人。奔至銀行之門。大呼曰。總統來矣。殺賊。殺賊。於是彼此開槍戰於銀行門外。余曰。西奴林娜行也。顧四望。皆黑行時。乃不辨道。余顛頓中。抱持西奴林娜而行。西奴林娜竟仆於地。已而已。見海水之光。然而古人有言。平地易跌。吾輩今日之功。亦正敗於垂成。余方愕。顧問。聞西奴林娜大呼。立臥於地。余伏而視之。則一老樹之根。觸足跌而跌。大痛徹心。且暈。余大窘。問之。但曰。痛極。余無術。爲之摩撫。飲之以酒。可半句鐘。女雖醒。但哭勿動。麾余曰。汝疾行避禍。吾留此足矣。余曰。汝果不能動。吾抱爾登舟。女稱可。余遂負之而行。至於水次。正欲登舟。忽聞有馬蹄之聲。絕疾。余顧之。卽爲總統。以槍向西奴林娜。徐言曰。馬丁。汝果欲行者。吾先死此人。女曰。約翰。汝且釋我。否則立死。是人。不爲第二言也。余無術。置之地上。總統曰。彼胡爲弗動。余曰。傷其左足。總統曰。吾知爾意。然爾運殊劣。奇謀乃爲我所敗。余曰。汝不聽吾行耶。總統曰。然。余曰。請與公較武。總統曰。否。汝年少。應如是。如我。

之年。則不悅。有此事也。實告汝。吾來時。早料及此。一至銀行。見爾不在。已知爾謀。遂赴西奴林娜家。而又不見。遂決計。至是追汝。果乃不出所料。汝今如何者。余曰。汝姑言之。總統曰。以我言之。姑留此人。聽爾行止。余曰。汝國家大局未定。何爲與我爭此玉人。甯不畏大佐處汝肘腋。總統曰。大佐不能來矣。因曰。此廬舍爲誰。且入其中聚語。並將此女扶入彼中。此廬舍卽船戶也。余往叩門。船人大駭。總統曰。汝有淨榻否。可移此女郎先臥其上。以爾妻侍之。船家夫婦扶女入室。總統曰。馬丁。吾有言告爾。余坐而總統吸煙無言。余曰。總統。汝趣言之。吾此時已墜樊網。不能抗汝矣。總統曰。汝且勿躁。靜聽吾語。余曰。彼間事已安謐耶。總統曰。百事皆畢。但須醫生。余曰。大佐如何。總統曰。大佐已死。吾手殊之。余爲愕然。總統曰。今日之來。但誅一二人。餘人見我皆降。大佐之死亦勇。擊死吾從者數人。願衆寡莫敵。乃爲吾軍所得。余曰。然則大佐非陣死。捉而殺之耳。總統微笑曰。此等人收局。應爾。余曰。如何。總統曰。肇亂卽爲是人。尙有一節。吾所爲事。彼敢處處爲梗。卽汝亦當。

留意。余思總統之爲人兇狡已極。中心不能不懾。於是均無言。少頃總統曰：馬丁吾深不願與爾爭競。卽爾前此助大佐亦出我意外。余曰：爾賺吾金。吾焉能已。總統曰：此亦不復相怪。然汝能否知我用意所在。余曰：公之用意。但取吾金。并吾斥去耳。總統曰：非也。金固所欲。卽亦欲用爾身。及後此觀爾欲圖西奴林娜。於是思驅爾於域外。不令爾更留是間。余曰：今公意將如何。總統不答。但敍已事曰：汝心亦至狠。我雖恨汝。然亦深惜爾才。語後徘徊不已。似決殺我。及生我二事。忽爾凝立曰：馬丁。汝舟已具。以行爲當。否則。句。余曰：此女留爲公得矣。總統曰：然。余曰：苟此女不願嫁。公將奈何。總統曰：女子安有智慮。汝但行一禮拜。後彼欣然事我矣。余思此語雖出總統。而西奴林娜之爲人性等。楊花亦正難恃。於是。以手扶頭。頗抑抑莫耐。已而言曰：汝能容我再見西奴林娜乎。總統曰：可。余曰：當以一人與見。總統又曰：可。趣入決別。余遂躡步登樓。見女偃臥似睡。余伏而親之。女張目視余。言曰：約翰。汝耶。余曰：然。今當別汝。不行。且及禍。然行。但一人。余言時。女無言。但抱。

吾頭親之曰。傷哉。約翰。吾親愛之。約翰。事勢到此。汝力不足。與爭。余大震。曰。西奴。林娜。汝究愛其人否。女曰。愛之。余無言。竟下。自恨其愚。既下。謝總統曰。吾願行矣。總統曰。善。卽出鈔一卷。曰。用此贈行。余受之。登舟發機而行。總統送余。水次曰。祝爾平安。爾我或有相見之日。惟今日之勢。斷不相容。汝亦毋再恨我。余曰。此吾否。運不敢怨公。迨吾舟旣行。總統曰。汝勿論。何適。必以書示我。以寓處。余挽其舟。一人一舟。趣沈沈深黑之海而去。

第十五章

爲余一人計者。吾書已盡矣。後此之事。亦不勞讀者之目。質言之。吾但以手力所有。供我口腹。願成此一書。以己之事爲結穴。則似乎爲己。不屬於公言。今將補敘前此所敘之人。以醒讀者之眼。自余離奧里塔蘭。則決計不歸英國。總行中去金三十萬元。安能不向余索取。余至美國。遂易姓名爲小貿易。已而少獲衣食。奧里塔蘭忽不見余。則謠言謂余挾金而遁。余亦無敢伸辯。幸總統復辟後。在議院中。

宣言爲余表白其冤。曰：前此銀行總理馬丁同謀逐我。固屬有罪。而銀錢一節。初無染指。其逃畏罪。非盜金也。至於三十萬金錢。吾當歸罪大佐。彼敢強劫外國之人。匪特外人所不齒。亦吾法所弗容。自是夕後。此三十萬金。乃不知所在。大佐既死。百罪皆叢其身。總統言此等巨金。政府萬不能償。至於法律。是否如是。余乃不。如總統之精。惟余心甚幸。第二次僞電。乃不發余之罪。總統亦以書與總行。不承此債。總行不可。遂興交涉。總行言不更在灰丁罕設行矣。後此不審如何。而分行仍立。余則不能知矣。余至美國。曾以寓處告總統。逾二年。亦得一箋。初無他語。祝余平安。言已娶西奴林娜矣。邇來復得一書。則敘其全文於此。曰：吾親愛之馬丁君。居奧里塔蘭久。或習知其國俗。卽告爾以事。或亦樂聞。吾雖與君介介。惟前悵已消。卽敘吾瑣事。汝當不厭吾瀆。約尼已娶度支大臣之女安東尼倭。此事爲約尼生平有見之舉動。女亦至佳。不審何事。乃與西奴林娜相忤。今吾將大佐遺產。盡與約尼。彼夫婦亦足自活。尙有一節。安得生醫生與地瓦其亦成配偶。此二人

中年花燭。全國以爲美談。爾舊人穹司歸國已經年。彼於是夕著驚。且冒寒。至今尙偃臥牀席。今以新經理人至此。爲人至拘謹。與之假資。良不易。須知以謀全國。爲事絕難。吾經營十五年以外矣。雖毀譽並至。斥我爲浪子。然吾力尙能支此一國。今亦倦勤。深恐負此重任。意將辭職。願以人自代。深難其選。初欲用汝。近得祖國來書。勸吾仍爲附庸。書言奧里塔蘭果內附者。仍許有自治之權。前此國債均祖國承之。且以五十萬金爲酬庸之費。用以勞我。我意殊決。容與國會商之。卽復舉行。老夫旣得此五十萬元。又增以私蓄。晚年或足自活。若不幸而逝。西奴林娜亦足自豪。國債旣清。汝必能自歸於英國。且吾辭職後。或亦借寓美洲。挾西奴林娜同來。惟餘事未清。當爲吾平日信用。安置妥帖。吾事始畢。西奴林娜寄聲問汝。且甚欲與爾相見。果爾欲續餘情者。待老夫死後。更言之。馬格司灰丁罕頓首。未幾卽聞人言。奧里塔蘭果內附於祖國。凡國中歷史國債。一一結束。聲影都寂。竟出余意料之外。惟國度旣墮。而憶及少年遊釣之區。水碧山明。思之不無耿耿。

逾數日。復得西奴林娜書曰。約翰。吾乃不料。更與爾相見前事。乃不忍言傷哉。吾約翰也。馬格司待我厚。顧老病繇綴。汝尙憶吾前此之美麗乎。實告君。吾容尙未消滅。待至美洲時。當先以書告汝。汝卽至車站迎我。吾先行。馬格司後至。汝若弗蒞。吾且怒。嗔來時。可並挾白薔薇。而至。汝果存得此花。則後此定有重圓之日。其下則女自署名。讀者試思。彼爲有夫之婦。竟有此書。余進退維谷。然白薔薇固在。余何妨一袖此花。見其人也。